



增補甘泉縣志

函捌

ル 5  
3144  
8





門 5  
流 3144  
卷 8

增修甘泉縣志卷八

甘泉縣知縣吳鄂峙 張宏運 王熙泰 原纂

甘泉縣知縣陳觀國 揚州府教授李保泰續輯

甘泉縣知縣徐成斂 桂正華 朱公純 增訂

名宦志

漢董仲舒廣川人孝景時為博士武帝即位以賢良對策出為江都王非相王帝兄素驕好勇仲舒以禮義匡正王敬重焉久之王問仲舒曰越王勾踐與大夫泄庸種蠡謀伐吳遂滅之孔子稱殷有三仁寡人亦以為越有三仁仲舒曰越本無一仁夫仁人者正其誼不謀其



利明其道不計其功是以仲尼之徒羞稱五伯為其先詐力而後仁義也王稱善後徙膠西王相去位

漢書

按今董子祠在北柳巷即仲舒故宅

趙苞字威豪甘陵東武城人初仕州郡舉孝廉再遷廣

陵令政教清明郡表其狀遷遼西太守封鄃侯

後漢書

馬稜字伯威扶風茂陵人章和初遷廣陵太守時穀貴

民饑奏罷鹽官以利百姓賑貧羸薄賦稅興復陂湖溉

田二萬餘頃吏民刻石頌之

後漢書

張綱字文紀蜀犍為人漢安元年遣八使巡行風俗綱

獨埋其車輪於洛陽都亭曰豺狼當路安問狐狸遂奏

梁冀等不法十五事時廣陵賊張嬰等眾數萬人寇亂

揚徐間積十餘年冀乃諷尚書以綱為廣陵太守因欲

以事中之綱單車之職將吏卒十餘人徑造嬰諭以順

逆利害嬰深感悟明日率所部與妻子面縛歸降綱散

遣部眾任從所之親為卜居宅相田疇人情悅服綱被

疾吏人皆為禱祀祈福及卒老幼相攜赴哀者不可勝

數嬰等五百餘人制服行喪送到犍為負土成墳詔追

褒官其子續為郎中賜錢百萬

後漢書

按綱引大石湖水灌民田號張公渠在江都

荀曇字元智漢末為廣陵太守時宦寺擅權曇志欲除



之其黨至郡纖罪必治畧無避忌用是坐黨禁錮廢終身

嘉靖維揚志

陸稠字伯羸為廣陵太守有威惠姦吏斂手郡中諺曰

解理結煩我國陸君

同上

張超東平壽張人初平元年為廣陵太守值董卓擅政

郡功曹臧洪說超曰明府歷世受恩兄弟並據大郡王

室將危此誠天下義烈報恩效命之秋也今郡境尙全

吏司殷富若除國賊為天下倡義之大者也超然其言

魏書

與兄邈及兗州刺史劉岱等歃血而盟起兵討賊

陳登字元龍建安中為廣陵太守明審賞罰威信宣布

未及期年功化以就及遷東城太守廣陵吏民佩其恩

德闔郡隨登老弱襁負而追之

魏志

按登於郡西治塘蓄水小民號之愛敬陂

張載字仲宗為廣陵太守舉吳奉為孝廉載罷郡奉齋

金為禮載不受奉以囊盛投載園中而逝載齋金至廣

陵還之

謝承後漢書

晉周玘揚州秀才令江都太安初石冰之亂玘同前南

平內史王矩吳興內史顧祕討之廣陵度支陳敏以廣

陵相據江東叛玘復同顧榮合兵誅之時懷帝永嘉元

年也

萬歷縣志

按晉書止載玘討石冰之亂不言為江都令舊志不知何據姑存之

名宦



徐寧東海剡人少知名為輿縣令時廷尉桓彝稱有人倫鑒識嘗去職至廣陵尋親舊還遇風停浦口累日憂悒因上岸見一室宇有似廨署訪之云是輿縣彝乃造之寧相遇欣然因留數夕彝大賞之結交而別至都謂庾亮曰吾為卿得一佳吏部郎亮問所在彝即敘之尋遷吏部郎左將軍江洲刺史

晉書

袁瓌字山甫陳郡陽夏人瓌與弟猷奉母避亂求為江淮間縣拜呂令轉江都因渡江猷字申甫少與瓌齊名代瓌為呂令復相繼為江都兄弟列宰名邑論者美之

同上

郗鑒字道徽高平金鄉人明帝時以尚書令遷車騎將軍都督徐兗青三州軍事假節鎮廣陵咸和初蘇峻反鑒去賊密邇城孤糧絕流涕設盟登壇慷慨三軍爭為用命及陶侃為盟主進鑒都督揚州八郡軍事鑒率眾渡江峻平拜司空加侍中封南昌縣公

同上

卞壺字望之濟陰冤句人父粹為侍中立朝正色長沙王乂忌而害之壺依妻兄徐州刺史裴盾盾以壺行廣陵相累官光祿大夫加散騎常侍咸和三年蘇峻稱兵犯闕壺力疾苦戰死之二子眇盱同時遇害峻平詔贈侍中驃騎將軍開府儀同三司謚曰忠貞祠以太牢

同上



謝安字安石陽夏人太元中累官侍中都督揚豫徐兗青五州諸軍事秦苻堅率眾百萬次於淮淝京師震恐安舉從子元帥師拒之大敗堅於淝水進拜安太保出鎮廣陵築壘曰新城以壯保障時城北湖水每漲輒沒民田安築平水埭隨時蓄洩歲用豐稔後人追思之名爲召伯埭同上

謝元字幼度安從子太元初苻堅彊盛邊境數被侵寇朝廷求文武良將可以鎮禦北方者安乃以元應舉拜建武將軍兗州刺史領廣陵相監江北諸軍事堅將句難等攻淮南元自廣陵西討與賊大戰破之難等僅以

身免元還鎮廣陵以功封東興縣侯及苻堅大舉入寇元先遣廣陵相劉牢之以五千人直指洛澗擒其將旣而元與堅決戰淝水南堅中流矢眾奔潰論功進封康

樂公同上

孔衍魯人孔子後避地江東元帝時爲廣陵太守時郡接西寇政務劇冗衍猶教誘後進不以戎務廢業明南畿志

蔡濟令興縣時大旱濟乃剡臂然香率眾懇禱甘澍隨

降一邑霑足萬曆縣志

宋徐湛之字孝源東海剡人元嘉二十四年出爲前軍將軍南兗州刺史湛之善爲政威惠並行廣陵城舊有



高樓湛之更加修整南望鍾山城北有陂澤水物豐盛  
湛之更起風亭月觀吹臺琴室果竹繁茂花藥成行招  
集文士盡游玩之適一時之盛也

宋書

沈慶之吳興武康人大明三年竟陵王誕據廣陵反帝  
以慶之爲南充州刺史加都督率眾討之至城下誕登  
樓謂曰沈君白首之年何爲來此慶之曰以君狂愚不  
足勞少壯故使僕來耳慶之營洛橋西焚其東門塞漸  
造攻道立行樓土山并諸攻具每攻城輒身先士卒上  
戒之曰卿爲統任當令處分有方何蒙楯城下身受矢  
石耶自四月至七月乃克斬誕進慶之司空卒贈侍中

太尉諡曰襄

同上

賀弼字仲輔會稽山陰人有文才大明中爲竟陵王誕  
記室參軍誕據廣陵反弼固諫再三誕怒抽刃向之及  
沈慶之討誕兵屢敗或勸弼出降弼曰公舉兵向朝廷  
此事旣不可從荷公厚恩又義無違背唯當死明心耳  
乃服藥自殺贈車騎將軍山陽海陵二郡太守

陸慧曉字叔明吳郡吳人建武中爲五兵尙書遷南充  
州刺史慧曉清介正立不雜交游張緒稱之曰江東裴  
樂

南齊書

梁霍儁廣陵令邵陵王綸率眾討侯景敗績綸奔京口



賊獲霍雋等來送城下徇之逼云已擒邵陵王雋獨云  
王小小失利已全軍還京口城中但堅守援軍尋至賊  
以刀毆之雋言辭顏色如舊景義而釋之 宋書

祖皓易州人大同中為江都令侯景陷臺城皓起兵於  
廣陵斬景刺史董紹先推前太子舍人蕭勔為刺史又  
結魏人為援馳檄遠近將以討景景大懼即日率侯子  
鑿等出京口水陸並進皓嬰城拒守景攻城陷之車裂  
皓以徇 梁書

蕭景字子照梁武帝從父弟初武帝起兵以景行南兖  
州事時天下未定江北僭楚各據塢壁景示以威信渠

帥相率面縛請罪旬日境內皆平武帝踐祚封吳平縣

侯南兖州刺史加都督會年荒計口賑恤又為饘粥於  
路以食之死者給棺具人甚賴焉 同上

蕭績字世謹梁武帝第四子天監十七年為都督南兖  
州刺史在州以善政稱尋有詔徵還百姓曹樂等三百

七十人詣闕上表稱績異政一十五條乞留州任優詔  
許之 同上

劉詢廣陵令封山侯正表叛襲廣陵兖州刺史南康王  
會理使詢夜襲破之收其兵糧歸就會理同人援 萬曆縣志

馮慈明字無佚信都長樂人大業十三年攝江都郡丞

增修古身殿志 卷之八 名宦 七



事詔令慈明安集瀍洛為李密黨所執密延坐謂曰隋祚已盡區宇鼎沸今欲率四方之眾問罪於江都卿以為何如慈明曰不義之言非所當對潛使人奉表江都及致書東郡留守論賊形勢密知其狀義而釋之出至營門賊帥翟讓亂刀斬之時年六十八贈柱國戶部尚書昌黎郡公諡曰壯武

隋書

張惠紹大業末司馬德戡將為亂惠紹夜馳告裴蘊謀欲矯詔發郭下兵盡收逆黨宇文化及等議已定遣報虞世基世基疑反者不實抑其計須臾難作

同上

沈光字總積吳興人少驍捷善戲馬畧綜書記大業中

為折衝郎將江都之難宇文化及以光驍勇令其總統營於禁內光自以荷恩深重將為帝復讐潛構麥孟才錢傑等陰圖化及孟才為將軍領江淮之眾數千人期以晨起襲化及光語洩化及大懼夜與腹心走出營外遣司馬德戡等領兵逮捕孟才光聞營內誼聲知事發不及披甲即襲化及營空無所獲值舍人元敏數而斬之遇德戡兵入四面圍合光大呼潰圍斬首數十級賊皆披靡德戡復遣騎持弓弩翼而射之光身無甲冑遂為所害麾下數百人皆鬪死一無降者時年二十八壯士聞之莫不隕涕

同上

名宦



唐婁師德字宗仁鄭州原武人弱冠進士擢第授江都尉揚州長史盧承業奇其才嘗謂之曰子台輔器也後專綜邊任前後三十餘年參知政事以功名始終卒贈

涼州都督諡曰貞 舊唐書

李襲譽字茂實隴西狄道人通敏有識度高祖初擢揚州大都督府長史揚州江吳大都會俗喜商賈不事農業襲譽為引雷陂水築句城塘溉田八百頃以盡地利民歸本業召為大府卿罷揚州載書數車嘗謂子孫曰吾性不喜財遂至窶乏然負京有賜田十頃能耕之足以食河內有千株桑能樹之可以衣江都書力讀可進

求宦吾歿後能勤此無資於人矣 唐書

姚崇字元之陝州硤石人累遷中書令以言事貶申州刺史移徐潞二州遷揚州長史政條簡肅人為紀德於碑崇長吏道明決無淹三為宰相封梁公諡文獻 同上

第五琦字禹珪京兆長安人少以吏幹進能言強國富民術至德初謁肅宗於彭原言今之急務在賦賦所出以江淮為淵若假臣一職請悉東南寶貨飛餉函洛惟陛下命帝悅拜監察御史勾當江淮租庸使琦隨事趣辦人未嘗益賦而用以饒累封扶風郡公 同上

李吉甫字弘憲贊皇人栖筠子年少明練典故累官至



檢校兵部尚書出爲淮南節度使帝爲御通化門祖道賜御餌禁方居三歲奏蠲逋租數百萬築富人固本二塘溉田且萬頃漕渠庠下不能居水乃築隄閘以防不足洩有餘名曰平津堰江淮早有司不爲請吉甫白以時救恤帝驚馳道使分遣賑貸吉甫雖居外每朝廷得失輒以聞卒贈司空諡忠懿

同上

劉晏字士安曹州南華人廣德二年爲江淮轉運租庸常平使晏卽鹽利僱傭分吏督之隨江汴河渭所宜舊轉運船由潤州陸運至揚子斗米費錢十九晏命囊布而載以舟減錢十五由揚州距河陰斗米費錢百二十

晏爲歇艍支江船二千艘每船受千斛十船爲綱每綱二百人篙工五十人自揚州遣將部送至河陰上三門號上門填闕船米斗減錢九十調巴蜀襄漢麻枲竹篠爲絢挽舟以朽索腐材代薪物無棄者未數年人人習河險歲轉粟百一十萬石無升斗沉溺輕貨自揚子至汴州每駄費錢二千至是減九百歲省十餘萬緡晏始於揚子造轉運船每一船破錢千貫或譏其妄費晏曰大國不可以小道理凡所創造須謀經久廼於揚子橋置十船場差專知官十人不數年間皆致富贍凡五十餘年船無破敗餽運亦不闕絕晏理鹽鐵惟置官於出

名宦



鹽之鄉取鹽戶所煮鹽鬻於商任其所之不出鹽州縣不復置官曰官多則民擾其始江淮鹽利不過四十萬緡季年六百餘萬緡末年更逾十倍而人不厭苦古今稱善理財獨歸晏云

嘉靖維揚志

蘇瓌字昌容京兆武功人弱冠本州舉進士累遷揚州大都督府長史揚州地當衝要多富商大賈珠翠珍怪之產前長史皆致之數萬唯瓌單身而歸

舊唐書

杜亞字次公京兆人興元初爲淮南節度觀察使時揚州官河填淤漕輓湮塞又僞寄衣冠及工商等多侵衢造宅行旅擁滯亞乃開拓疏啟公私悅賴

同上

杜佑字君卿京兆萬年人以工部郎中歷官尙書右丞出爲淮南節度使佑決雷陂以廣灌溉斥海棄地爲田積米至五十萬斛列營三十區士馬整飭四鄰畏之佑精於吏職爲治不曠察相民利病而上下之議者稱佑制行無闕拜光祿大夫卒諡安簡佑廣劉秩政典爲通典二百篇儒者服其書約而詳

唐書

李珣字待價其先出趙郡客居淮陰累官至吏部尙書出爲淮南節度使時江淮旱珣發倉廩賑流民以軍儲羨殺半價與人及疾亟官屬見臥內惟以州有稅酒直而神策軍爲豪商占利方論奏未見報爲恨一不及家



事珏性寡欲門無餽餉淮南人德之立碑刻其遺愛卒  
贈司空諡貞穆 同上

張延賞蒲州人爲淮南節度使歲旱民遷入他境吏禁  
之延賞曰食者人恃以活吾不能贍其生奈何禁其就  
食乎乃具舟遣之勅吏爲修室廬寬逋責歸者更增於  
舊瓜步舟艦輻輳而遙隸江南延賞請改屬揚州於是  
行無阻滯 嘉靖維揚志

杜棕杜佑子爲淮南節度使武宗聞揚州娼女善酒令  
勅監軍選十八人以獻監軍請棕同選棕曰監軍自受  
勅不敢預聞監軍怒具奏其狀武宗曰杜棕得大臣體

朕甚愧之勅勿選

明南畿志

康令失其名亦不知何許人咸通中爲江陽令時大旱  
令以身代犧牲赴水死天卽大雨民悲懷之爲立康令

祠

嘉靖維揚志

五代韓令坤磁州武安人少隸周祖帳下積功至都指  
揮定武軍節度使世宗親征淮南聞揚州無備遣令坤  
等馳襲之令坤撫輯有條民皆安堵卽以令坤知州事  
顯德五年世宗復幸淮右揚州城爲吳人所毀詔發丁  
壯築新城命令坤爲修城都部署能程功而不勞民 府志補



向拱字星民懷州河內人周顯德二年世宗親征淮南以拱權東京留守時揚州初平南唐出師境上謀收復韓令坤有棄城意世宗驛召拱赴行在拜淮南節度兼緣江招討使以令坤爲副時周師久駐淮揚都將趙晁白廷遇等驕恣橫暴惟務貪淫至有劫人妻女者拱至戮其不奉法者數輩軍中肅然時周師圍壽春經年未下江淮草寇充斥吳立兵柵於紫金山與城中烽火相應而舒蘄和泰復爲吳人所據拱上言欲且徙揚州之師併力攻壽春俟城下改圖進取世宗從之拱乃封庫付揚州主者遣牙將分部按巡城中秋毫不犯軍民感

悅及師行有負糗糧以送者至壽春改淮南道招討都

監宋史

李重進其先滄州人周太祖之甥也生於太原歷官至歸德軍節度恭帝嗣位加檢校太尉改淮南道節度宋太祖受禪重進治城隍繕兵甲以拒命太祖親征次大儀鎮徑至城下卽日拔之重進舉族自焚死

同上

宋李處耘潞州上黨人宋太祖討李重進爲行營兵馬都監重進平以處耘知揚州大兵之後境內凋敝處耘勤於綏撫奏減城中居民屋稅民皆悅服建隆三年詔歸京師老幼遮道涕泣累日不得去

同上



增修古身集志 卷之八  
王禹偁字元之鉅野人至道間知揚州眞宗卽位詔求直言禹偁上五事疏奏召還復知制誥咸平三年在黃州奏疏曰江淮大患有三城池墮圯一也兵仗不完二也軍不服習三也望陛下特許江淮諸郡酌民戶眾寡城池大小並置軍士多不過五百人閱習弓劍然後漸葺城壁繕完甲冑則郡國有禦武之備矣上嘉納之子嘉言後以進士第爲江都簿 同上  
許逖大中祥符二年知揚州時郡中仕宦子弟出入里巷爲不法逖捕其甚者笞之皆羞愧自悔稍就學問風俗大化 嘉靖維揚志

杜衍字世昌山陰人少苦志厲操尤篤於學擢進士甲科補揚州觀察推官後知揚州章獻太后遣使安撫淮南役旋未及他語輒問杜衍安否使者以治狀對太后嘆曰吾知之久矣衍爲治謹密不以威刑督吏然吏民亦憚其清整不敢爲姦後入相封祁國公諡正獻 宋史  
王琪字君玉成都華陽人珪從弟也起家進士調江都主簿上時務十二事請建義倉置營田減度僧罷鬻爵禁錦綺珠貝行鄉飲籍田復制科興學校仁宗嘉之除館閣校勘集賢校理累官淮南轉運使兩知揚州以禮部侍郎致仕 宋史



胡令儀陳留人天聖中淮南轉運使范仲淹請築捍海  
堰會大雨雪役夫有陷濫死者謹言堰不可成朝命令  
儀按可否令儀熟知潮患力主仲淹議堰卒成民至今  
賴之

南畿志

韓琦字稚圭相州安陽人仁宗時以資政殿學士知揚  
州增學田奏請蠲無名之稅又請常平倉米以備賑荒  
揚民樂其愷悌愛慕之如父母為肖像祀於雍熙院蔣  
之奇作記有云魏公前出二府而領維揚之麾後相三  
朝而建淮南之節雖十年之間屢更節鉞而終不易鎮  
則維揚之人挹魏公之德宜何如哉卒贈尚書令諡忠

獻宋史

范仲淹字希文蘇州吳縣人舉進士嘗監泰州西溪鹽

稅遷右司諫時歲大旱蝗江淮滋甚仲淹請遣使撫循  
未報迺請間曰宮掖中半日不食當何如帝惻然因命  
仲淹安撫江淮所至開倉賑之後除參知政事會王倫  
寇淮南州縣有不能守者朝廷欲按誅之仲淹曰平時  
諱言武備寇至而專責守臣死事可乎守令皆得不誅  
以資政殿學士遷戶部侍郎卒贈兵部尚書諡文正宋史  
范端字思道江州德化人仁宗時為江都令歲旱知揚  
州張若谷遣端與他吏視民田他吏白歲善端獨白田

增修古身縣志

卷之八

名宦

七



實旱若谷疑之端持旱苗力爭乃卒從所白吳遵路蔣堂為淮南轉運使使端護河役端往視還言河不可為遂罷端用他吏而河果不可為三人乃共薦端歷官至尚書庫部員外郎知臨江軍事卒於位 會南豐集

歐陽修字永叔廬陵人舉進士慶歷八年知揚州寬簡不擾蒞政三五日間事十減五六兩月後官府閑如僧舍或問故曰吾寬不為苛急簡不為繁碎爾非廢事也築平山堂與賓客讌賞賦詩遂相傳為勝蹟後拜參知政事卒諡文忠 參宋史及舊府志  
于觀字通叟如皋人登嘉靖二年進士令江都嘗上揚

州賦賜緋魚銀章

萬歷縣志

馮京字當時江夏人自鄉舉禮部以至廷試皆第一仁宗時以龍圖閣待制知揚州京為郡守諸縣公事至即歷究之苟與縣牘合而處斷麗於法者呼法吏決罪不以付獄報下捷疾一無壅滯人服其敏後以太子少師致仕卒贈司徒諡文簡 宋史

包拯字希仁廬州合肥人歷仕龍圖閣直學士以喪子乞便郡知揚州拯性剛毅聞者皆憚之舊制凡訟訴不得徑造庭下拯開正門使得至前陳曲直吏不敢欺累遷樞密副使卒贈禮部尚書諡孝肅 宋史



王鼎字鼎臣大名館陶人仁宗時以進士第累遷淮南等處制置發運使前使者多漁市南物因奏計京師貽權貴鼎一無所市獨悉心精吏事事無大小必出於己凡調發綱吏度漕路遠近定先後爲成法於是勞逸均吏不能爲重輕入爲三司鹽鐵副使終天章閣待制王素字仲儀莘縣人太尉旦季子以進士出身累擢天章閣待制淮南轉運按察使時新置按察類多以苛爲明素獨不撻細故間有貪刻必繩治窮竟以故下吏愛而畏之終工部尚書諡懿敏

宋史

羅適字正之台州甯海人元豐中爲江都令民有訟曲

直徑決於前不以屬吏若小過輒誨諭遣去黎明視事入夜猶不已曰與其委成於吏民有不盡之情孰若勞己之耳目哉政化大行訟者益少復大石湖改名元豐溉田千有餘頃遠近自陳復陂塘溝渠之利者一切聽許水利之興復者五十有五溉田六千頃桑亦八十五萬株有奇出私錢營給貧病之民所瘡不可勝計歲滿代去民思之卽邵伯埭繪像祀之

秦觀淮海集

蘇軾字子瞻眉山人元祐六年以龍圖閣學士知揚州舊發運司主東南漕法聽操舟者私載物貨征商不得留難故操舟者富厚以官舟爲家補其敝漏且周船夫

名宦



之乏故所載率皆速達無虞後一切禁而不許故舟楫人困多盜所載以濟饑寒公私皆病軾請復舊從之又嘗奏揚民爲積欠所壓檢察本州宜縱而拘於法者六條乞住催理從之先是蔡京守揚州宴集爲萬花會用芍藥數十萬枝吏緣爲姦民不勝其擾軾悉罷之未閱歲以兵部尚書召兼侍讀後卒諡文忠

參宋史及舊府志

晁補之字無咎鉅野人通判揚州以文章著名而政事敏達太守蘇軾稱爲風流賢別駕旣而其弟詠之亦調揚州司法參軍軾雅重其能文顧坐客曰奇才也

明一統志

盛度字公量餘杭人以右諫議大夫知揚州遷端明學

士以尚書右丞罷復知揚州度簡重少許可甄拔人才精於藻鑑有蘇某者客游抵揚作書上度覽而器之曰君才宜應制科蘇以養親爲難度曰吾有租八百斛可成君之志且力爲延譽蘇遂登高第官至參政又有建州司戶參軍夏有章者授鄭州推官謁度度稱其才特置酒餞之有章爲詩以謝度得詩不發封還之通判刁繹疑而問度度曰吾始謂其遠器及閱詩封乃自稱新圃田從事得一職而氣已輕將止於是矣後卒如其言度終少傅太子太保諡文肅

康熙府志

呂公著字晦叔夷簡子元豐間知揚州公著性勤勵在



郡率未明而起秉燭視牘雖燕居如齋時接賓僚尤詳聽覽小吏賤胥咸得輸其情理官有繫重囚而置酒宴會者公著遣吏諭之皆悔懼由是上下咸修其職轉運司輦乳香萬觔配賣郡中悉停之郡庫雖符檄督迫不為強配民尤德之元祐中入相封申國公卒謚正獻萬歷

府志

鄒浩字志完常州晉陵人第進士調揚州教授倡明正學士服其化刻沈括夢溪筆談於郡齋時呂公著守揚州甚加禮遇後公著被召首薦之歷官兵吏二部侍郎寶文閣待制宋史

劉敞字原父臨江新喻人舉慶曆廷試第一元祐初知揚州揚之雷塘漢雷陂也舊為民田其後官取瀦水而不償以他田民皆失業然塘亦破決不可漕官復用為田敞據塘舊券悉用還民發運司爭之敞不從其在郡論囚察冤人尤相傳為神明後以集賢院學士判南京御史臺卒南史

鍾離瑾字公瑜廬州合肥人舉進士歷遷江淮制置發運使時殿直王乙者請自揚州召伯埭東至瓜州濬河百二十里以廢二埭詔瑾規度以工大不可就止置牖召伯埭旁人以為利後除龍圖閣待制擢知開封府卒



宋史

胡宿字武平常州晉陵人登第為揚子尉縣大水民被溺令不能救宿率公私船活數千人宿以誠事主白首不忍欺累遷樞密副使卒贈太子太傅謚文恭 同上  
鮮於侁字子駿閬州人舉進士元豐二年召對命知揚州神宗曰廣陵重鎮久不得人今朕自選卿往宜善治之司馬光嘗謂蘇軾曰子駿一路福星也安得百子駿布之天下乎侁在揚命馬希孟探索境內簡帙作揚州集後除集賢殿修撰 參宋史東都事略按府志補  
呂好問字舜徒壽州人崇寧初治黨籍好問以元祐子

弟坐廢官揚州儀曹蔡卞為帥欲扳附善類待之特異好問以禮自持卞不得親及卞秉政諷之曰子少親我即階顯列矣好問笑而不答 宋史本傳

張絳字伯成吳人提點淮東路刑獄權知揚州事時方鑄崇寧大錢行新鈔法小錢舊鈔盡廢百姓皇皇商賈有自殺者絳上言錢法誤民請如舊以示大信蔡京怒罷絳初絳父棗教子極嚴故絳與弟綜皆有文名并善政云 嘉靖維揚志

續志考正張絳宋史章棗傳子絳誤作張

劉蒙政和六年通判揚州時江淮諸郡民苦水患流移



四出泰州高郵至三千餘人轉聚於揚蒙曲加賙恤咸得不死事聞上特遷一秩旌之

嘉靖維揚志

陳邁字亨伯永州人登進士第徽宗時歷淮南轉運使時方督綱餉運渠壅澀邁請決句城陳公兩塘達於渠漕路甫通而朱勔花石綱塞道官舟不得行邁捕繫其人而上章自劾帝爲黥勔入進邁徽猷閣待制欽宗立加資政殿學士徙知中山府爲步將沙振所害金人入見其屍曰南朝忠臣也斂而葬之鐵柱寺建炎初贈特進

宋史

許份字子大閩人初仕揚州兼淮東兵鈐靖康初上復

召諭揚州古名郡今以委卿剷除宿弊份因請曰臣聞應奉司封記花竹凡山林之勝士民之居騷然無復遺地願速罷去又言揚一都會而江都天長不足以供經費師臣又於經賦外增上供窮民不堪願如政治三年舊額皆從之金人再入寇份卽日檄兵勤王以解亳州之圍而漕糧至畿甸者不絕時諸路援兵所至多縱剽掠不聽入城軍士病之份大啟城闈至則撫勞而去秋毫無犯揚民晏如

嘉靖維揚志

岳飛字鵬舉河南相州湯陰人其勇畧戰功具詳宋史建炎初自乞淮南東路一重難任使收復本路州郡乘



機漸近授通泰鎮撫使與金人戰南霸橋大敗之使不得橫延郡城保捍之功甚大後爲秦檜所害天下寃之追封鄂王諡武穆改諡曰忠武

參本傳

向子諲字伯恭臨江人宣和初除江淮發運司主管文字時淮南歲旱漕不通有欲濬河與江淮平者內侍主其議無敢可否發運司檄子諲行子諲言自江至淮數百里河高淮數丈而欲濬之使平決不可曩有司三日一啟闢復作澳儲水故水不乏比年行直達之法加以應奉往來啟閉無節堰閘率不存今復故制嚴禁約則無患使者用其言漕復通進秩一等累官徽猷閣直學

士

宋史

顧頤字元直樂陵人

中進士第高宗卽位除知揚州車駕南幸頤浩入見進戶部尙書劇賊張遇屯金山頤浩與韓世忠諭降之建炎二年金人逼揚州車駕南渡鎮江召從臣問去留頤浩叩頭願且留此爲江北聲援不然賊乘勢渡江事愈急矣駕幸錢塘拜江淮兩浙制置使以討苗傅劉正彥功拜尙書右僕射同平章事紹興二年出都統江淮荆浙諸軍事八年卒贈太師封秦國公諡忠穆頤浩有膽畧善鞍馬弓劍當國步艱難之際人倚之爲重

同上

增修

卷之八

名宦

三



張浚字德遠漢州綿竹人中進士第建炎初高宗駐蹕揚州浚奏請無忘二帝北狩當留意中原汲汲修德救敝以振紀綱時內侍占揚州官寺奏罷止之又車駕及從人戀揚州繁華無行意浚請降旨示不久住仍早措置定居之所然後揚州免供億之擾四年以樞密院赴江上視師時兀朮擁兵十萬約日渡江決戰浚召韓世忠張俊劉光世將士見浚勇氣十倍世忠遣王愈請兀朮約戰兀朮曰張樞密貶嶺南何得乃在此愈出浚所下文書示之兀朮色變夕遁後復爲江淮宣慰使封魏國公卒贈太師諡忠獻

參宋史及朱子撰張公行狀

韓世忠字良臣陝西延安人高宗建炎二年爲定國軍承宣使帝如揚州世忠以所部從時張遇自金山來降世忠獨入其壘曉以逆順眾悉聽命三年爲淮南東西路宣慰使四年金人與劉豫合兵分道入世忠親提騎兵駐大儀伐木爲柵自斷歸路遂大敗之論者以爲中興武功第一而揚州則大賴其捍衛以安後封咸安郡王孝宗朝追封蘄王諡忠武

宋史

子皆死之

姓譜



劉錡字信叔德順軍人紹興三十一年金主亮調軍六十萬自將南來中外大震乃以錡為江淮浙西制置使引兵屯揚州建大將旗鼓駐清河口金人以糧裹船載糧而來錡使善沒者鑿沉其舟退軍召伯鎮金人攻真州錡引兵還揚州帥劉澤以城不可守請退軍瓜洲金萬戶高景山攻揚州錡遣員琦拒于皂角林陷圍力戰林中伏發大敗之斬景山俘數百人捷奏賜金五百兩銀七萬兩以犒師卒贈開府儀同三司諡武穆 宋史魏俊 宋史 王方為劉錡軍將後屬李橫俊為左軍統制方為後軍統制金人以重兵逼瓜洲分兵東出江皋逆

趨瓜洲橫以孤軍不能當却失其都統制印魏俊王方

死之瓜洲于其戰歿處建廟祀之 同上 舊志明太祖嘗感夢俊方助國立

廟府城額旌忠歲時祀之 陳俊卿字應求興化人登進士第累遷中書舍人孝宗

立志在興復以俊卿忠義沈靖有謀以本職充江淮宣撫判官建興初建都督府俊卿除禮部侍郎參贊軍務張浚請于朝出師已而兵潰俊卿退保揚州主和議者幸其敗議罷浚都督改宣撫使治揚州俊卿奏浚果不可用別屬賢將若欲責其後效降官示罰古法也今削都督重權實揚州死地人心解體向何後效之圖上悟



復浚職後卿後以少師魏國公致仕 同上

莫濛字子濛湖州歸安人以祖蔭補將仕郎兩魁法科  
仕戶部左曹郎中出知揚州陛辭上以城圯命濛增築  
濛至州規度城闔分授諸將各刻姓名登堞間縣重賞  
激勸閱數月告成上曰使任責者人人如濛天下何事  
不成除直寶文閣學士大理寺少卿累遷至工部侍郎  
同上  
崔與之字子正廣州人舉進士歷官銓部員外郎時金  
南遷于汴朝議疑其進迫特授與之直寶謨閣權發遣  
揚州事主管淮東安撫司事寧宗宣引入內親遣之奏

選守將集民兵為邊防第一事既至浚濠廣十有二丈  
深二丈西城濠勢低因疏塘水以限戎馬開月河置釣  
橋州城與保砦城不相屬舊築夾土城與之為易以壁  
因除有山林之阻創五砦結忠義民兵金人攻淮西沿  
邊之民得附山自固金人亦疑設伏自是不敢深入揚  
州兵久不練分彊勇鎮淮兩軍月以三八日習馬射令  
所部兵皆倣行之金人入境宰相連遺與之三書俾議  
和與之亟修守戰備遣精銳布要害金人深入無功而  
和議亦寢召為秘書少監軍民遮道垂涕後以觀文殿  
大學士致仕累封至南海郡公諡清獻 同上



李處端字能白邯鄲人淳熙十二年授江都令時縣解  
殘於兵燹案牘棲列無所吏抱持歸於家朝昏赴庭遇  
雨則立漚淖中且六十年處端為鼎新之三月落成公  
私稱便 萬歷縣志

余晦四明人初辟制置大使司幕官尋令江都時百務  
蝟興最繁且迫晦以一身肩之不為所困江都迎新令  
例有公費晦謝不取以之建堂榜曰清晝云 同上  
應武天台人嘉泰間掌郡學教事課試有程基迪有方  
雖寒暑昕夕在私家絕少被其教者粹於經麗於辭多  
所成就其滿而去也諸生繪像事之 明南畿志

趙范字武仲蒲圻人京湖制置使方子也嘉定間通判  
揚州旋進直徽猷閣知揚州時劉全王文信二軍老幼  
留揚范欲修軍政懼其徒漏泄兵機遣徐晞稷書令二  
人挈家歸楚范厚資以遣有孫海者其眾亦八百范併  
請抽還楚州又請勅馬軍三千招游手之強壯者及籍  
牢城重役人充之別籍民為半年兵春夏在田秋冬教  
閱官免建砦而私不廢農上書史彌遠曰揚州者國之  
北門一以統淮一以蔽江一以守運河不可無備又為  
書告廟堂請罷調停之議專戰守紹興三年與弟葵同  
殲李全進兵部侍郎淮東安撫使兼知揚州後加吏部

增修甘肅通志

卷之八

名宦

三



侍郎進工部尙書 宋史

趙葵字南仲范弟也寶慶元年范知揚州乞調葵以強  
勇雄邊軍五千屯寶應備賊紹定中爲淮東提點刑獄  
李全攻揚州東門葵親出戰賊將張友呼城門請葵出  
及出全在濠立馬櫛勞苦左右欲射全葵止之切責  
之言甚多全無以對彎弓抽矢向葵而去於是數戰皆  
捷遂殺全葵前後畱揚八年墾田治兵邊備益飭入對  
帝曰卿父子兄弟宣力甚多卿在行間又能率先士卒  
捐身報國尤儒臣所難景定元年授兩淮宣撫使判揚  
州累封冀國公卒贈太傅諡忠靖

鄭興裔初名興宗顯肅皇后外家三世孫也孝宗時自  
廬州移知揚州揚與廬舊爲鄰初興裔在廬嘗卻鄰互  
送禮至是按郡籍見前所卻者有出無歸遂奏嚴其禁  
揚有重屯糧乏例糴他境興裔搜括滲漏以補之食遂  
足民舊多茅舍易焚興裔貸之錢命易以瓦自是火患  
乃息又奏免其償民甚德之修學宮立義塚定部轄民  
兵升差法郡以大治致政卒贈太尉諡忠肅 宋史  
彭方字季正江西都昌人朱子守南康受業於白鹿洞  
開禧中揚州教授建七賢堂祀韓忠獻公七人遷景陵  
令以薦入直龍圖閣累官兵部侍郎龍圖閣直學士卒



諡文定

康熙府志

王鑑字仲明幼警敏精騎射紹定三年李全犯揚州江淮大使司檄鑑從趙葵往救鑑乘賊始至出迎擊之賊識鑑旗幟曰淮東硬軍也四年安撫使趙范戒朝食期翌日出兵大戰葵曰非王都統不可約鑑帥兵以往鑑環甲待旦躍馬至北門或以非地分勸鑑徐行則揮之曰同舟遇風何地分爲全適宴北使於平山堂意驕我軍鑑率單騎直前相距纔數百步厲聲呼逆賊全汝在山東作殲賊歸宋得節度之旌乃背義孤恩昊天不庇今日當盡予手全怒奔馬戰無幾塵埃漲天范葵遣兵

斷全歸路全爲鑑所敗偕十餘騎走而西至新塘墮水鑑追至左右射全與其黨皆死捷聞特授左武大夫復州團練使終京湖宣撫大使司諮議

嘉靖維揚志

楊文仲字時發眉州彭山人寶祐登進士第添差通判揚州牙契舊額歲爲錢四萬緡累增至十六萬開告訐以求羨文仲曰希賞以擾民吾不爲也卒如舊額制置使李庭芝檄主管機宜文字時有沙田使者欲舉行之文仲力爭以爲興利之惠有限不擾之惠無窮江北風寒之地民力竭矣爲利幾何安忍重擾吾民乎事遂寢召爲宗學博士遷太常少卿

宋史

名宦



李庭芝字祥甫其先汴人徙應山縣淳祐進士開慶初  
權知揚州尋居憂後朝議擇守揚者帝曰無如庭芝乃  
奪情拜制置使時揚新遭火廬舍盡燬庭芝悉貸民錢  
使爲屋免其償一歲中官民居皆具始平山堂瞰揚城  
元兵至則構望樓其上張車弩射城中庭芝築大城包  
之募汴南流民二萬人以實之命爲武銳軍又大修學  
爲詩書俎豆興士行習射禮郡中有水旱卽命發廩不  
足則以私財賑之揚民德之如父母德祐元年春賈似  
道兵潰蕪湖沿江諸郡無一人能守者庭芝率所部郡  
縣城守時李虎持招降榜入揚州庭芝誅虎焚其榜總

制張俊持孟之縉書招降庭芝焚其書梟俊等五人於  
市日調苗再成戰其南許文德戰其北姜才施忠戰其  
中人人爲之死鬪朝廷加庭芝參知政事知樞密院事  
元阿朮攻揚久不拔乃築長圍困之城中食盡宋亡謝  
太后及瀛國公爲詔諭之降庭芝登城曰奉詔守城未  
聞有詔諭降也已而兩宮至瓜洲復詔庭芝命發弩射  
使者阿朮使人持詔來招降庭芝開壁納使者斬之焚  
詔俾上糧盡兵有烹子而食者猶日出苦戰益王遣使  
以少保左丞相召庭芝庭芝與姜才將兵東入海至泰  
州被執遂遇害死之日揚民皆泣下

同上 庭芝與姜才同葬揚之梅花



嶺坊額曰雙忠

姜才濠州人德祐時爲通州副都統賈似道軍潰元兵乘勝攻揚州才爲三壘陣逆之三里溝戰有功又與元帥戰楊子橋日暮兵亂流矢貫才肩才拔矢揮刀而前所向辟易已而元軍築長圍自楊子橋竟瓜洲東北跨灣頭至黃塘西北至丁村務欲以久困之有舍人持謝太后詔來諭才發弩射卻之瀛國公至瓜洲才與李庭芝泣涕誓將士出奪之將士皆感泣以四萬人夜擣瓜洲戰三時眾擁瀛國公避去才進戰至浦子市夜猶不退元阿朮使人招之才曰吾寧死豈作降將軍耶四月

才以兵攻灣頭柵五月復攻之騎旋濇而止乃舍騎步戰至四鼓全師以歸六月護餉至馬家渡萬戶史弼將兵擊奪之才與戰達旦弼幾殆阿朮馳兵來援乃得免去才與庭芝東至泰州阿朮追及使使者招之降才不聽阿朮驅揚兵士妻子至城下會才疽發背不能戰諸將遂開門降入才臥內執之以獻阿朮愛其忠勇欲降而用之才肆爲慢言阿朮怒磔之同上

趙淮葵之從子也李全之叛屢立戰功累官至淮東轉運使德祐中戍銀樹壩兵敗與其妾俱被執至瓜洲元帥阿朮使淮招李庭芝許以大官淮陽許諾至揚城下



乃大呼曰李庭芝男子死耳毋降也元帥怒殺之棄屍江濱其妾賂軍校得焚淮屍拾骸骨抱之赴江死  
陸秀夫字君實楚州鹽城人景定元年登進士第李庭芝鎮淮南聞其名辟至幕中天下稱得士者以淮南為第一秀夫才思清麗一時文人少能及之者性沉靜不苟求人知每僚吏至閣賓主交驩秀夫獨歛然無一語或時宴集府中坐尊俎間矜莊終日未嘗少有希合至察其事皆治庭芝益器之三遷至主管機宜文字咸淳十年庭芝制置淮東擢參議官德祐元年邊事急諸僚屬多亡者惟秀夫不去庭芝上其名除司農寺丞後累

官至左丞相奉少帝居厓山厓山破仗劍驅妻子入海即負少帝赴海死同上  
元史弼字君佐一名塔刺渾蠡州博野人從阿朮取揚州授昭勇大將軍揚州路總管府達魯花赤後為淮東宣慰使凡三官揚州有惠政人喜刻石頌之號三至碑後封鄂國公年八十六卒于家元史  
郝彬字景文霸州信安人世祖初年十六充太子宿衛擢揚州路治中宋末鄞縣賊顧潤聚眾海島時出攻剽宋羈縻以官內附後益橫侵揚州境彬討擒之揚賴以安官終大司農卿同上



張炤字彥明濟南人至元十三年陞大中大夫揚州路總管府達魯花赤商議行中書省事佩金虎符行省在揚州據南北要津招撫勞來上下安之卒封清河郡侯諡敬惠 同上

胡長孺字汲仲婺州永康人至元間拜集賢修撰與宰相議不合改教授揚州元史稱其學自九經諸史下逮百氏及律令章程無不條理而揆序之長孺為教授時誘引諸生者不倦人皆宗慕之郡二千石延講經義環聽者常數百人後移任建昌去 萬歷縣志

明繆大亨定遠人從太祖征伐歷元帥率師取揚州降

青軍元帥張明鑑得其眾數萬晉樞密同僉鎮揚州有治畧寬厚不擾市民失火無力構屋大亨給木助之卒于官民哀之如親喪 明一統志參雍正府志

張德林鳳陽人明初授江淮分院元帥丁酉七月繆大亨率師取揚州以其地要害置江淮翼元帥府命德林同耿再成守焉時籍城中居民止存十八家德林招集流亡軍民輯睦以舊城虛曠截西南隅築而守之今揚州府城是也 萬歷江都縣志

王彬字文質東平人洪武中進士監察御史建文四年巡按江淮駐揚州靖難兵至彬與鎮撫崇剛嬰城堅守



時守將王禮謀舉城降彬執繫之于獄而內禦外防晝

夜不解甲且以能舉千觔一力士自隨乃禮弟崇以計

誘力士出乘彬解甲浴粹縛之出禮于獄開門納靖難

兵彬與剛俱不屈死之本傳 新舊 府縣志 參

崇剛舊志 鄧剛 今從 吾學 編改正揚州衛世襲指揮沉鷺有胆氣善

謀畫建文四年靖難兵至揚州剛與御史王彬銳意禦

守薦某可守某可戰某可具兵械某可辦芻糧彬聽之

日夜巡守剛練兵濬濠匡贊盡力既而彬被執剛亦不

屈死參王彬本傳 嘉靖 維揚志

陳瑄字彥純合肥人永樂初以右軍都督僉事督海運

及宋禮治會通河成罷海運命瑄董漕運議造淺舡自  
瓜儀直達京輔于湖隄內鑿渠通舟南北造梁以便行  
者每十里置一淺舖鑿井種柳飲庇緯挽者理漕運三  
十年封平江伯卒諡恭襄子豫孫銳俱嗣理漕務云萬 歷

府志王竑字公度江夏人正統中進士給事中直聲震天下

景泰二年以右僉都御史巡撫江北適淮揚大饑諸倉

空虛獨廣運倉尚有儲積竑欲發之主者有難意竑曰

民窮至此旦夕且為盜爾不吾從脫有變吾先治爾致

盜罪主者許之存活五十八萬八千餘人安輯他境流

曾參甘泉縣志 卷之八 名宦



寓者萬六百餘家先是帝聞荒狀驚問奈何無饑死我  
民及聞發倉事喜曰好都御史成化中晉兵部尚書卒  
諡莊毅 名山藏

王恕字宗貫三原人正統中進士改庶吉士由大理左  
寺副遷知揚州府發粟賑饑創資政書院以興文教治  
行最遷去成化間以刑部右侍郎總督河道浚邵伯諸  
湖修上下雷塘句城陳公四塘水閘晉兵部尚書兼右  
副都御史巡撫江南孝宗卽位晉吏部尚書正德三年  
卒年九十三贈太師諡端毅 本傳  
陸愈字抑之平湖人進士成化十一年知江都縣會歲

荒計口給賑貸以牛種其鬻子女者捐俸贖歸之城西  
多江南屯戍有翁子正者聚黨剽劫捕獲之仍請設上  
官司巡檢以控其地焉又增築邵伯湖隄以禦水患用  
歲辦餘錢以儲賑粟秩滿遷去百姓咸立碑頌之 嘉靖  
維揚

蔣瑤字粹卿歸安人弘治中進士正德時知揚州歲饑  
卽請留漕米以賑聽獄以理論使人心服去武宗南巡  
一僚屬欲賦民供應瑤裂其稿曰民何可賦耶第從簡  
臨期利害吾一身當之耳比至諸璫欲采民間女進侍  
瑤預令民間先自嫁娶畢而後復之郡舊有瓊花觀詔



取瓊花瑤對以宋時花種已絕又索諸珍異瑤概以非揚產對帝曰苙白布亦非揚產乎乃止獻苙白布五百疋其餘一無所擾駕旋瑤扈蹕至寶應中官邱得以鐵絙繫瑤數日送至臨清而還揚人見之無不泣者嘉靖初遷陝西參政去揚人競構生祠祀之官至工部尚書

諡恭簡

本傳

易瓚字廷器肅甯人進士嘉靖間知揚州府治事最勤案無留牘壬午癸未歲連饑瓚既請賑于朝仍召父老詣富室勸輸預集饑民給三月之食繼得旨悉如所請又遣僚屬分賑各州縣全活十九萬餘人貨種三萬七

千餘戶歷巡撫河南右副都御史

萬歷府志

合書

雷應龍字孟升蒙化人進士御史嘉靖五年視兩淮鹽政揚舊有五司徒廟神像以銅為之下令撤去其廟改祀宋儒胡安定先生并飭毀各州縣淫祠無數其後日久禁弛復立五司徒銅像賴李御史佶王御史鼎相繼巡鹽巡按至復碎五銅像鑄文廟祭器榜五司徒不當祀之義以示民而乃益知前舉之為正大也

康熙府志

侯秩字季常長垣人進士嘉靖十一年知揚州以勤儉率下逐俳優罪諸佚遊者濬陳公塘以資灌民田多方儲粟二十萬以備民食民以訟至府不數言而決雖重



增修古吳縣志 卷之六  
獄不旬日淹也一歲蝗入揚境輒散不為患人以爲太守治化之所感云 萬歷府志

吳桂芳字子實新建人進士嘉靖三十一年知揚州初至有水患請發賑蠲稅百姓德之及倭寇江北募練鄉勇爲守禦之策採郡人何城之議于郡城東西築一新城以護鹽課議甫定遷臨清兵備去有守揚疏議四卷

萬歷府志

石茂華字崇質益都人進士嘉靖三十四年知揚州值有倭寇羽書旁午從容應之晝夜登陴拊循士卒倭退踵前守吳公之議環河築新城捍衛商民廬舍畫地分

工畚築之事皆親爲籌畫九閱月城成明年倭復至望見有城引去民稱之爲石城累官至侍郎 萬歷府志

歐大任字徵伯粵順海人嘉靖末訓導江都學甚該洽坦率無城府故人皆樂與之游相與談史漢文選之學倡和爲詩號竹西社隆慶末檄修世宗實錄因采廣陵賢士大夫爲十先生傳又有浮淮輶中二集 萬歷府志

吳秀字平山烏程人隆慶間進士萬歷十九年知揚州甫下車首請復五塘上官難之卽日攜家去士民遮道爭留上官爲請復三塘而止城內市河淤塞新城北隅舊無濠秀挑北隅隍若干丈引官河水灌之并濬城河



之淤者與新隍合闢一門曰廣儲內建倉廩外築梅花  
 嶺水波縈帶舟楫相通以為便時常有倭寇秀儲穀練  
 兵樓櫓悉備胥吏請報大戶守城秀叱止之并碎舖戶  
 當官碑石與民平價郡以大治遷興泉副使去凌儒遺  
受碑  
 姚祚瑞字□□烏程人進士萬厯間江都令城東北隅  
 有石人長二丈許嵌砌牆上偶一黃冠詐以為靈妄稱  
 禍福以致禱祈填咽通國若狂祚瑞立碎之妖遂止在  
 任五年擢御史去康熙府志  
 潘季馴字時良烏程人進士萬厯間四任總督河道前  
 後二十七年習知地形險易築隄設防置官建閘下及

木石椿埽諸務其得力在築高堰束淮水出清口以敵  
 河之強刷河之濁使二水併流則海口自無阻壅條上  
 六事從之兩河工成加太子太保工部尚書兼右副都  
 御史卒本傳

按高家堰起重淵巨浸瀦於召伯諸湖泄於  
 高寶七州縣歸於江海皆公底定之功也

史可法字憲之大興人崇禎元年進士厯官巡撫安廬  
 總督漕運晉南京兵部尚書十七年四月間李自成陷  
 京師烈皇帝殉社稷縞衣發喪欲長驅死賊未幾福王  
 立南京馬士英擁兵入可法知勢不兩立請督師淮揚



加太子太師兵部尚書武英殿大學士駐揚州時高傑在揚州縱兵淫掠可法疏請以瓜洲城屯其眾而已則開府城內闢禮賢館招四方才智之士任用之屢疏請餉不發明年四月左良玉東下王手書召可法入援次燕子磯聞良玉已敗乃令速還還抵天長一日夜奔揚州調兵各鎮無一至者二十日我朝大兵已至班竹園總兵李栖鳳監軍副使高岐鳳拔營出降城中勢益孤諸文武分陣自守可法自守舊城西門作書與母訣立副將史得威爲後越二日城破可法自刎不死一參軍擁出小東門爲我兵所執可法大

呼曰我史閣部也可速殺我勸之降不從遂殺之參軍吳爾壘揚州知府任民育同知曲從直王纘爵江都知縣周志畏羅伏龍兩淮鹽運使揚振熙監餉知縣吳道正江都縣丞王志端幕客胡如理盧渭等皆從死

本傳

按府縣志俱云可法死養子得威尋其屍不得招魂葬衣冠於梅花嶺

國朝王宇春遼東人順治五年揚州知府時國家初平南服大兵絡繹經過府境宇春必親至郊外以牛酒犒軍又親送之出境秋毫無犯民至今德之祀名宦

康熙府志

王士徵字貽上新城人進士順治十七年府推官風裁



峻整斷決平允株連者立釋之而主持風雅時與四方名流本地文人學士賦詩高會於紅橋蜀岡之間治春詩流傳宇內藝林珍之祀名宦 康熙府志

吳伯琮徽州人順治十七年以舉人署江都教諭清慎厚重教士有方重建明倫堂啟聖祠新聖賢諸像遷宜山令去諸生勒石志去思焉 雍正縣志

金鎮字長真宛平人舉人康熙十三年知府事值三逆之變大兵過境征調繁興鎮籌畫多方民不知擾先是負販入城者例當輸稅鎮概免之并減僦屋租價貧民尤便之郭西北平山堂郡勝地為栖霞寺僧所占鎮興

復之有堂有樓大觀真賞具備焉又修郡志四十卷擢

江南驛鹽副使晉臬使祀名宦 康熙府志

慕天顏字鶴鳴靜寧州人進士康熙十三年江蘇布政使值大水揚屬河隄盡決漂沒田廬民皆露宿隄上天顏身親至災處拊卹之人給蓆蓬以為栖發倉儲以為食仍疏請涸出田畝三年免徵并區畫牛種以招徠復業奉

俞旨悉如所請行後擢撫江蘇總督漕運民至今德之祀名宦 雍正府志

靳輔字紫垣奉天人康熙十五年總督河道時黃淮並



灌運道衝決河隄數百里田廬皆成巨浸輔一一堵塞之民始復業卒諡文襄各州縣祀名宦 同上

于成龍字北溟永甯人康熙二十年總制兩江嚴絕苞苴痛懲豪猾而雅重文教在揚州立紅橋書院集高才生誦肄其中資以膏火焉卒於位各州縣俱祀名宦 雍正府縣志

崔華字蓮生平山人進士康熙二十年知揚州多善政尋遷兩淮鹽運使修學宮置義塚設江上救生船遷陝西參政去祀揚州名宦 同上

湯斌字潛菴睢州人進士康熙二十三年巡撫江蘇清

介坦直正己率屬吏治肅然而闡明程朱正學檄毀淫祠除數百年黷祀俾人知黜邪崇正焉遷禮部尚書管正詹事諡文端 雍正府志

熊開楚字文友湖廣石首人進士康熙二十四年知江都縣立易知由單胥吏不得上下其手更除漕米包攬之弊他如勤賑濟瘞遺骸為貧民贖已鬻子女惠政甚夥行取去卒祀名宦 雍正府志

張鵬翮字運青遂甯人進士先以兵部侍郎視江南學政所拔盡寒畯康熙三十八年河淮並決命鵬翮總督河道甫蒞淮安而邵伯鎮更樓衝決漂沒田廬行道阻



增修甘泉縣志 卷之八  
絕鵬翻至大哭爲文告河神立堵決口民始復業更數載後窪田盡成腴壤至今食其利晉尙書拜大學士卒諡文端 同上

傅臘塔滿洲人康熙三十一年總督兩江洞燭各地方利弊懲貪墨鋤強豪循行郡邑親問小民疾苦爲興利除患焉卒民思之所在皆祀名宦 同上  
傅澤洪字樸菴奉天人康熙三十二年知揚州明于聽斷人不敢以虛誣控者因水災急于賑濟擅發倉穀罷官後留劾河工游擢淮揚道副使行部至揚百姓爭以壺漿餉悉謝却之所著有行水金鑑一百七十五卷 同上

張瑀字石公無極人進士康熙三十六年知江都縣縣有巨猾肆行無忌瑀杖斃之境內莫不稱快先是納糧賦者無印冊稽考瑀創立文簿分十限任民輸納親投入櫃以杜胥吏欺隱至今仍之任五載以憂去 雍正府縣志

張伯行字孝先儀封人進士康熙四十八年巡撫江蘇秉介節持正不阿除各州邑浮稅而于江北被水之區撫恤尤至後與總督噶禮互相參劾在揚州聽勘麤糲爲餐揚民爭以簞食獻悉却之既奉旨稱伯行天下清正第一復任逾年擢倉場侍郎去晉禮部尙書卒諡清恪各州縣祀名宦 雍正府志



陳鵬年字滄洲湘潭人進士康熙六十年署河道總督周視河道情形修舉廢墜而按行揚州上下河議疏通蓄洩之法最得要欸會河決武涉亟馳去隨卒於官諡

恪勤各州縣祀名宦 同上

項維聰字穎叔嘉興人舉人康熙五十七年知江都縣

丈明江地以贏補紕豁枯丁核三义河疏淺費皆章章

著明者而周恤邵伯諸湖濱被水百姓尤肫摯焉三年

行取百姓以水一盂鏡一圓送之 同上

蔣鶴鳴字陞遇嘉興人舉人雍正二年知江都縣廉靜

和平盡力於賑濟舉同仁會周貧者學宮向無樂器祭

器鶴鳴創製之以銅件繫其筋兩著之籍越歲以捕蝗

積勞卒官 同上

袁載錫字心友青浦人舉人江都教諭人品樸誠勤於

訓士嘗月課質衣為諸生備試卷及茗點絕不以為苦

兩廡兩祠將圯捐俸倡修而自掃西廡後一室讀書講

藝于其內泊如也 同上

龔鑑字明水錢塘人幼力學淹博經史皆能成誦雍正

七年以拔貢引見

上器其才命往江南十年署新設甘泉縣部署新設事宜

井井有條軫災恤貧勤於夙夜而剛直有操每聽訟立



剖曲直無枉者滿歲限復引見卽眞益自砥礪常進邑諸生課以實學士風爲之一變焉在任六年以憂去尋卒

以上原志

邑居附郭衝劇地也撫循字養無赫赫功臨于上者自太守至節鎮統馭者廣非邑敢私存其梗概于儒官亦兼采焉

紀晉字企瞻文安人舉戊午鄉試由桃源調任甘泉勤于職事拊循決斷商民帖然嘗過邵伯湖知二閘將壞急請當道爲先事防或阻之不果已而閘陷隄壞大吏

重其先見題陞江防同知而部議以踈防落職留任辦賑尋卒其在桃源辦災也開倉發賑不待報牒所全活甚多

賀祥珠江西奉新人雍正癸丑進士以文學飾吏治廉靖不擾遇事卽剖決而意常藹然在任值丁丑大差鎮靜如常先是曾署寶山事未及一年而謫頌在人口不謾治甘一如治寶也以艱歸

王兆棠浙江錢塘人以太由縣丞擢甘泉令時揚極繁盛吏事清簡兆棠精幹有爲洞悉纖隱雍容肆應爲上游獎拔歷官至江寧布政使山東李士珠在王前累陞



增修甘肅通志 卷之八  
河庫道繼王任者四川宋觀光亦至江甯府三政相繼  
名位顯著最稱一時之盛云

顧惇量字壽峰新陽優貢生爲南匯訓導以艱改補甘  
泉早以文學有名循循課誦于戶外事漠如也書史詞  
翰從容嘯咏爲不失儒官本色

鄭環字清如武進人爲諸生久有聲庠序以歲貢中丙  
午鄉試大挑二等嘉慶四年涖任性樂善不倦常州故  
有恤養會環欲廣其法于揚力請大府前長跪不起適  
總督陳公大文捐銀檄淮南商生息充費選紳士司其  
事永垂利濟平居與諸生譚經課藝矜立名節人爭重之

以上續志

劉大烈安徽巢縣人道光元年任儀徵縣六年任甘泉  
縣八年任高郵州爲人外剛方內仁恕每莅官日輒微  
行私訪宵小聞風歛迹澆俗化爲良善所至興利除弊  
善政極多士民咸敬服之

姚瑩字石甫安徽桐城人嘉慶十三年進士道光十二  
年揀發江蘇歷署元和諸縣移任淮南監掣同知有變  
通摠鹽緝私章程及挑儀河章程十二則皆便商便民  
十五年護理鹽運使時淮南懸引積滯以淮北溢課融  
銷南引議上制府不憚再三商力以紓十七年再護鹽



運使五月旱近海各場蝗蝻蠢動委員協三分司撲捕並請補鹽義倉穀後擢任臺灣道二十年坐事被誣陷逮下詔獄凡十有二日而事白以同知發四川由蓬州牧累遷湖南按察使卒於官工詩古文留心經世學著東槎紀略五卷康輜紀行十六卷寸陰叢錄四卷識小錄八卷東溟文集二十六卷詩集二十卷

事略

李璋煜字方赤山東諸城人進士官部曹道光十八年任揚州府慮事精敏明察而不迫慈和而能斷尤以立品立學爲亟下車觀風試士會府試取前列之有造者教焉常微行求民之疾苦邵伯埭立恤廢局董事者立

條約以請卒令舉行并釐剔揚州恤釐局影射諸弊爲民課農桑以敦儉樸力挽侈靡舊習聞士女有節烈行亟爲表揚又葺郝忠烈公祠立蕭孝子後訂史忠正公附祀之典增祀伊太守於桃花庵之載酒堂皆足頑廉懦立興起風俗調江甯知府洊升布政使丁憂去職李龠通字秬香直隸高陽人進士官部曹道光二十三年授兩淮鹽運使居官廉慎自持剔弊釐奸紀綱嚴肅在任六年始終如一商竈感頌不衰後升浙江按察使卒祀浙江名宦祠

桂超萬字丹盟安徽貴池人父以嗣任甘泉儒學超萬



隨侍讀書尊經閣中道光十三年進士二十四年任揚州府未逾年政通人和綱紀整飭揚州本舊遊地風俗民情洞若觀火下車日坐堂皇聽事發奸摘伏案無遁情勸民省衣服飲食遊觀浮費敦務農桑日入則與賓客故人講藝論學娓娓不倦二十五年冬調蘇郡升授福建汀漳龍道大府薦牘有古循吏風之語引疾歸著有必香樓文橋

郭沛霖字雨三湖北蘄水人道光十八年進士授編修大考二等洊升左贊善文辭博麗兼工書法咸豐三年以南河道員署兩淮鹽運使時揚城已陷駐劄泰州以

江運不通鹽無銷路議就場征稅設廠收稅設棧收鹽三策恤竈便民沿海得以安集是年淮南大旱提淮北協款並倡議鹽屬各官扣捐養廉五成以備撫恤災民全活甚眾倡修泰州學宮尊經閣並捐錢千緡增給胡公書院膏火補淮揚道督辦團練仍駐泰州六年揚城再陷部勒城守事宜集義勇二萬人營於九里溝張家堡聲勢甚壯及郡城克復泰州解嚴沛霖保障之力為多八年綜理揚州善後賊復攻揚州督眾堅守復出城迎敵孤軍無援城陷奪職効力安徽軍營協守定遠城陷死於難奉



旨開復原官

贈光祿寺卿

年譜

以上府續志

喬松年字鶴儕山西徐溝縣人道光甲午乙未聯捷成進士由工部主事以知府揀發江蘇補常州府升常鎮通海兵備道擢兩淮鹽運使司

特旨准其專摺奏事時兵燹兩淮引地不通招集散商行假道

法准鹽由東垣運銷更立淮南總局創設大棧行拖帶法運赴江廣銷售商獲厚利淮漕復興每年得課數十萬兩接濟餉糈賴以不竭咸豐十年擢江甯布政使司筦江北糧台兼鹽運使司淮揚道駐紮邵伯驛江南官

軍大潰賊益熾南台星散水師無從索餉江北岌岌可危松年聯民團沿江堵禦與各水師將領約片帆不准北向暫由北台協濟餉糈堵賊不得南渡叛將薛成良謀不軌松年密遣王萬清等賺成良入邵伯湖擒之江北一隅得以瓦全實松年不分畛域所致嗣移駐泰州整頓團練嚴防沿江各口力保裏下河籌辦揚州善後凡有益於士民者次第舉行揚之人至今感頌弗衰嗣升安徽巡撫陝西巡撫倉場侍郎東河總督卒於官贈太子少保謚勤恪入祀安徽江蘇名宦祠松年少年通籍敷歷中外豐功偉烈載在國史第就邦人所感頌者繫之



以誌盛德至善民不能忘云爾松年一生禮賢下士不喜西人諸器公餘之暇手不釋卷著有論語淺解蘿摩亭札記詩古文詞緯麈各數十卷重刊宋板朱子儀禮經傳通解

李修梅字次生廣東嘉應州人同治二年署理邑篆四年題補實授越三年因公被議去先後在任凡五稔時賊氛甫靖瘡痍未復修梅於招流亡卹災黎墾田畝復書院諸要政凡有益於士民者無不次第舉行尤長於聽訟遇濤張爲幻必悉心研鞫務得其情而後已如方遠猷失妻一案人皆言其寵妾凌妻修梅獨以爲必非

謀害且罪名出入甚重未便刑求乃以疑案上詳閱七年而始獲昭雪其詳審精密之處至今父老猶稱述之而獨於去官一節邑人則感戴不忘甚有言之泣下者方嘆教士之來揚也眾情洶洶謠詠四起若非修梅爲民受過極力調停勢必釀成巨案後來滇中馬加利之事其明鑒也夫修梅以愛民而罷官則民之愛之者宜乎浹肌淪髓思之於既去之後喬勤恪公稱其輿情愛戴去而益詠其德李學士承霖謂其求民病之稍甦而一生之得失毀譽皆不暇計正謂此也光緒某年卒於

揚州



歐陽正墉字崇如湖南人光緒三年由湖北糧道升授兩淮鹽運使下車卽訪求利民之事得悉揚通兩屬商旅利病農田水利爰檄兩淮候補運判徐紹垣總其事以紳尹瀚汪鎮助之數年間先後修仙女鎮之緯道築攔江埧之三里橋設姜堰至通之橋梁共一百三十餘處各按地名書之行旅稱便揚州至仙女鎮有巨橋三日董家溝曰廖家溝曰石洋溝董家溝又名萬福橋計長一百五十餘丈橋下河流爲通江要津終日潮汎直撼橋樁不數年輒朽折孔家涵石閘年久倒卸亂石當流舟觸卽碎正墉均委紹垣修治之更仿古社倉及豐

備倉意發鉅款購穀數萬石以備荒歉並建義倉以儲之郡中向有立貞育嬰因利等善局及揚儀冬賑一爲籌經費以期遠久其愛人之意有不容自己者惜未竟其志於光緒六年正月卒於官

何金壽字鐵生湖北江夏縣人同治壬戌科進士以二甲第二人授翰林院編修視學中州衡鑒精嚴選拔多知名士任滿回京充日講起居注官奉

詔陳言前後疏凡十一上能言人之所不敢言以保全

國體維繫人心爲根本嗣得京察一等以道府用光緒五年授揚州府知府六年春履任爲人性忠直而和平精



密剛正不阿之意渾涵於其中受事年餘爲民興利除弊揚郡向有恤養善舉金壽較向例必加增施濟待人慈厚處己潔清郡民咸感德焉七年夏旱祈雨受暑染疾不愈臨終自輓云伏枕臣心愧官守騎箕毅魄掃欃槍子七長名亮標陝西知縣

陳斌字繼亭蜀人同治元年署甘泉事以兵燹駐邵伯鎮鎮當南北衝要是時粵賊捻逆正肆日有逃亡過境斌設粥以食餓者費緡典衣濟之邑有命案胥吏必株連鄰里斌知其積習痛懲之惟索主者餘不問獄無大小必公斷之胥吏不敢虐一人以廉介不遂其志去任

去之日士民遮道送者數千人

徐成敷字實庵安徽宿松人由拔貢生

朝考一

等二名以知縣用分發江蘇光緒三年署甘泉縣下車

卽訪痞棍嚴治之紳民浹洽捕蝗積穀建倉增廣陵書院課額撥款修東西灣隄工因禱雨有靈重建靈雨臺龍王廟凡有益於民生者莫不稟請大憲毅然成之五年創修邑志未成六年春捐升道員過班呈請卸篆卒於官又秦曾熙浙江會稽人六年春履任數月值盛暑不雨步禱於甘泉山染疾不治終於任

以上新增

李元華以原任山東布政使奉



命督辦天津海防團練於光緒十一年四月卒於津赴至揚人  
哀之時邑乘將告成於此不傳元華之功德設厯久湮  
沒則邑人之咎也按元華字采臣安徽六安州人由舉  
人就揀選知縣咸豐初督辦安廬六等處團練所向有  
功洵保至

記名鹽運使加按察使銜同治六年

簡放兩淮鹽運使八年拜江蘇按察使之

命未一月調山東升布政使署巡撫任內因公被議夫元華早  
年督辦鄉團督撫將帥出其中與後來宣勤山左循聲  
卓著揚之人不盡知所知者莫如粵逆賴汶洸由清淮

敗竄一晝夜達邵伯中書許銘勳死焉過仙女鎮把總  
孔某死焉揚州聞警居民大恐元華率在城文武乘馬  
巡城登陴設守人心稍定時候補道吳毓蘭駐軍五台  
山元華飛咨令其迎勦毓蘭偵知該逆東來整軍以待  
汶洸勢窮力竭棄械就擒郡城安堵如故苟非元華先  
機部署鎮靜不動其禍有不可測者揚人德之深故知  
之確也至於整理鹺綱卹商裕課經營善後百廢具興  
則又不可枚舉矣

以上新增



社稷壇在西門外濠西甘泉地歲以春秋仲月上戊日  
 祭洪武三年知府周原福建嘉靖維揚志立夏  
 國朝因之析縣後江甘共祭  
 雍正十二年十月奉旨建立壇所磚臺一座中柱一根週  
 圍牆垣牌樓四座牌位二座  
 風雲雷雨山川壇在南門外二里江都地歲以春秋仲  
 月上旬祭洪武三年知府周原福建成化十五年知府  
 楊成重修萬歷江都縣志

令祠祀志上

社稷壇在西門外濠西甘泉地歲以春秋仲月上戊日

祭洪武三年知府周原福建嘉靖維揚志立夏

國朝因之析縣後江甘共祭

雍正十二年十月奉旨建立壇所磚臺一座中柱一根週

圍牆垣牌樓四座牌位

二座

風雲雷雨山川壇在南門外二里江都地歲以春秋仲

月上旬祭洪武三年知府周原福建成化十五年知府

楊成重修萬歷江都縣志



國朝因之析縣後江甘共祭

舊制壇立木主中為風雲雷雨之神左為境內山川之神右為本縣城隍之神雍正七年奉

上諭

以雲師雷師庇國佑民靈應顯然宜特建廟崇祀查前明集禮郡縣立雷雨壇於社稷壇西風雲壇於社稷壇東又明會典每歲春秋分後三日合祭雷雨風雲壇集禮既稱雷雨在西風雲在東今雷師廟應建於西方雲師廟應建於東方雷師照古制以立夏後申日祭雲師古無專祀酌依明會典合祭之期每歲秋分後三日致祭

雍正江都縣志

先農壇雍正十年析縣後遵

旨建

在便益門外黃金壩甘泉崇祭知縣龔鑑建壇設磚臺一座正殿三間配房二間大門一座石碑一塊周圍墻垣牌樓三座神龕牌位藉田四畝九分耕牛一具農具一副農夫一名歲給口糧在於藉田籽粒每年開給四石八斗每年祭祀品物羊一豕一帛一鋤一籩豆四

厲壇在北門外壽甯街洪武三年知府周原福建

嘉靖江都縣志

每歲有司以春三月清明日秋七月十五日冬十月一日致祭成化十年知府周源等修

嘉靖維揚志



國朝因之析縣後江甘共祭

八蜡廟在西門外甘泉地明嘉靖二十年通判周鼎建

康熙揚州府志

國朝因之歲以春秋仲月祭析縣後江甘共祭

雍正十二年奉

旨每年臘月上戊日致祭猪一羊一至日府縣公同致祭所

有祭銀例無開銷每年於各祭銀內通融

禮八蜡先嗇一司嗇二百種三農四郵表畷五貓虎  
六坊七水庸八此經之明文也鄭氏去百種而增昆  
蟲方氏亦去百種而分貓虎為二張子亦用百種而

序之於末皆非也昆蟲無作乃祝祠祀神正祈昆蟲  
之無作乃謂之祀昆蟲可乎焦氏筆乘

關聖祠一在府東三元坊每歲春秋及神誕日本府率  
同江甘二縣致祭前殿用牛一豕一羊一籩豆十二後  
殿用豕三羊三陳設籩豆十二

祠本建自元時馮子振廟記蘇昌齡為製起語趙孟頫  
書丹稱三絕

馮子振碑記大丈夫忠憤不酬於尺寸而廟食磅沛  
於九州功名不留於須臾而義烈感慨於千古長河  
之南大江之北陋之而偏州迂之而僻縣枵然數十



之眾輒哀金券地畚土伐木寧鵲衣百結不敢虛丹  
獲於雲長之祠祀寧蝸涎一角不敢乏牲酒於雲長  
之畝宮矧大邦劇邑人物充斥之鄉乎四百赤帝之  
璽睥睨於一旦徼倖之奸凶劉表無意於中原劉演  
殞命於幽朔卯金刀之胄僅懸其一縷之墜緒於樓  
桑大耳之衰宗雲長奮起河東與昭烈遇自爾周旋  
艱險投間抵隙之會未嘗不身親其間識者謂馘顏  
良白馬之圍不如破孟德於赤壁之鬪爭魯肅於益  
陽之瀨不如降于禁於襄陽之功勲業垂成貉夏爲  
厄有志之士蓋深悲之嗚呼昭烈展轉於公孫羈縻

於呂布棲遲於袁紹進無容足之地退無寄跡之穴  
四方響應之初乍合乍散乍奔乍軋殆不知其幾矣  
而雲長不肯輒去去輒復返古所謂主在與在主亡  
與亡者耶人間梗梗樛樛之夫後雲長千數百載所  
以願爲之執鞭不慕王之剪敵萬人不慕王之雄視  
百代不慕王能塊土列三分之漢鼎不慕王能赤手  
擎一面之荊州其拳拳向雲長之心者特以其當賊  
操九州之地已有其七之時伎窮力殫獨不忍背棄  
流離顛沛之昭烈爾彼張翼德亦若是矣英魂凜凜  
雖死猶生廣陵之城隍西廡舊構祠嚴祀雲長甚謹



予是以掇王之平生衷素如是併書之

嘉靖維揚志

一在大東門外疏理道甘泉地祭同前甘泉主之

一在舊城北門內路東亦甘泉地祭同前江都主之乾隆間郡人黃部郎履昂修葺廟宇又建造斗姥宮大樓

於廟內

城隍廟在府治西北江都地元至順二年花世輔建明

洪武二年災二十六年知府關敬祿重建正統十一年

知府韓宏修成化十年知府周源修

嘉靖維揚志

國朝因之府縣共祭析縣後江甘並從府祭

都城隍廟在堡城甘泉地相傳建自隋代

國朝順治甲申康熙丙辰戊子乾隆丙辰相繼重修

土穀神祠縣儀門東又各坊俱有

雍正江都縣志

名宦祠鄉賢祠

俱詳見學校

忠義祠節孝祠雍正十二年奉

旨創設江甘二縣共之係郡人金維紫購地汪少卿應庚營

建在縣學西祠三棟門堂房舍並全

馬神廟在大東門外馬監以春秋上戊日祭嘉靖四十

一年知縣趙訥重修

萬曆江都縣志

今廟一在演武廳東一在左衛街

旗纛廟在本衛後洪武四年指揮馬於建永樂八年指



揮姚凱修正統十二年指揮李鎧重修每歲以霜降日致祭

嘉靖維揚志

今廟圯每歲祭於演武廳

火神廟乾隆元年奉

旨添

設在甘邑所屬三元坊舊炎帝宮於每年六月二十三

日府縣公同致祭祭銀在於江邑閑款南水關工食內

支銀四兩買備猪一羊一陳設俱由江邑報銷

劉猛將軍廟雍正十一年奉

旨建

設同江都縣在於南門內縉紳坊地方毀五神廟改建

殿二進門樓一座照壁一座神龕一座並牌位每年正

月十三日誕辰臘月上戊日致祭每祭猪一羊一至期

府縣公同致祭祭銀每年在於各祭款內通融

董子祠舊在運司公堂後司址相傳為董子相江都王

時故宅有井曰董井宣德甲寅運使何士英乃加葺治

而覆以亭復屋其旁以祀董子大學士楊士奇為之記

正統中運使嚴徵重修之翰林侍讀金問有記正德間

畢運使璽以祠在司署中登謁不便乃請於巡鹽御史

朱冠以司西正誼書院改祀吏部尚書喬宇有記劉讓

置田以供祀事而問記於翰林修撰呂楠嘉靖甲申御

史張珩謁奠有文庚寅御史朱廷立謁祠而碑之庚子



御史胡植檄運使李邦表嗣修焉刑科都給中戚賢撰

記嘉靖鹽法志

續志考正董祠在今北柳巷運司署之右明各碑  
記具在其在運司公堂後者別自為祠

嘉靖五年巡鹽御史戴金同知劉璣等重修二十一年巡鹽御史胡植令祭董子祠運使主祭府縣并儒學師生俱陪祭永定為規是春行運使同白濬重修

嘉靖維揚志

國朝康熙三十三年運使劉德芳重建四十四年

御書正誼明道額懸祠內

雍正江都縣志

楊士奇董子祠記金華何士英為兩淮鹽運使司運司廳漢江都王相董仲舒故宅其遺井尚存士英考郡志及詢諸耆舊而信遂葺井而作亭於上又廳事之後作堂設仲舒位朔望必率僚屬致敬四方士大夫過江都知慕先賢者必升堂而拜造井而觀又退而竊歎士英之能尚賢也自孟子沒異端之說競起迨秦焚滅經籍盡廢先王之法而聖學遂湮漢興知崇尚孔子諸儒往往有出而卓然醞正者惟仲舒如論道之大原出於天強勉問學則知益明強勉行道則德日起與夫正誼明道之言皆有功於學者論正



增補甘泉縣志 卷之八  
心以正朝廷百官萬民四方及有國者不可不知春秋皆有功於世道君子謂使仲舒得遊聖門無慚游夏仲舒固孔子之徒也自漢以來孔子之道晦而復彰自仲舒始仲舒廣川人孝景時爲博士武帝卽位舉賢良對策天子悅之以爲江都王相後相膠西王史稱其進退容止非禮不行兩相驕王數上諫諍而正身以率下此豈徒見諸空言者哉洪武中升仲舒從祀孔子廟庭表先儒以儀來學也則其生之所居遺迹之所在士誠尙賢者其能自己乎詩曰高山仰止景行行止知尙董子其必心其心而道其道哉廣

川今德州余嘗過之訪仲舒故迹無復存者顧時吏茲土者無可與語而德州之人亦不復知有仲舒獨江都尙能致敬者由士英也

東里集

金問重修董子祠記兩淮鹽運使司開治於江都漢中大夫董仲舒之故宅也有井在今公堂之後宣德甲寅前運使金華何士英始葺其壞而加亭焉復卽其旁建屋以祀董子今運使四明嚴侯貞以四方賓旅與江都之人來瞻拜者弗便出入遷其祠於廳事之陽明潔周楨視舊爲有加落成之日聿修祀事所以尊前賢勵後學知爲政之先務矣問來請文記之



增修甘泉縣志 卷之八  
漢承秦滅學之後孝武初立卓然罷黜百家表章六經董子之功也其言語不在六藝之科孔子之術者皆絕其道勿使並進以武帝雄才大畧圖新厥治而董子所承若此及其答易王三仁之問與孟子對梁惠王同一軌轍先儒以其度越諸子於此徵之尤信或謂董子明春秋公羊之學其天人三策有受符災異之失曾不究制策有謂三代受命其符安在災異之變何緣而起則所答不得不然故東萊呂氏論之曰當武帝之初以賢良對策亦自有體不可輕置議論至於正心以正朝廷一節深得聖人之微旨公羊

不能到使其端委廟堂必能致隆漢業劉向以爲有王佐才管晏殆不及非過也且江都當東南要會自漢以來名蹤勝蹟委於野烟荒草之間者何可勝數以當時觀之董子蕭然一儒者迄今二千年人稱思之不足又從而祀之豈智力所能及哉夫治道之有原立言之可法嚴侯於此既有以得之矣不可以無記也因書其所自以遺之俾來者有考焉

嘉靖鹽法志

喬宇重遷董子祠記兩淮運司在揚州府治東其地乃漢江都王相董仲舒故宅宣德間運使金華何君士英建祠祀董子正統間四明嚴君貞遷祠廳事之



後宏治間新城畢君亨復於運司西建正誼書院正德辛未夏高平畢君璽爲運使蒞任之日見祠居廳後惕然靡寧以淮揚當衝要之地鹺司實會計之所士大夫欲進謁者恒以出入爲艱惟書院宏敞向明盍改圖焉乃請於巡鹽監察御史朱君冠以爲然於是聿新其規制塑董子像於中爲堂者四楹東曰祭器庫宰牲堂西曰圖書房致齋所楹之數各如之儀門左右有石碑亭巷之南北建綽楔二又買地若干畝以供春秋祭祀羨餘則以食守祠者祠之後作書院堂曰資仕東西齋曰博聞曰起道以收商竈子弟

俊秀者擇明經士爲之師以訓迪焉丹堊咸備教條具舉誠一時之偉也旣落成畢君走書於余求爲文以志其顛末宇惟聖人之道自戰國以來不明於天下久矣董子獨能抱遺經於坑焚之後潛心正學所以秦漢諸儒鮮有及者觀其論道之大原與義利王霸天人三策之對皆有合孔子之大旨先儒稱其淵源純粹自學問涵養中來者不信然歟董子雖不得顯於當時其遺言善行有功於後學者蔚乎其未泯也今江都又董子宦履之地御史朱君運司畢君乃克崇重而作新之凡章縫之士肄業於斯者務相勉



增修東莞縣志 卷之八  
焉以進修其實一洗夫薄俗功利矯詐之陋庶茲祠  
之遷有補於風化大矣豈直潔豆籩美輪奐而已哉  
畢君所至有政績前知廣川時亦嘗葺新董子書院  
茲修舉國課之餘又能稽古考德以儀來學皆不可  
不書也是爲記 克蒙稿

宋廷立謁董子祠記董子祠祠之門舊爲正誼余曰  
奚爲逸明道也更曰大儒祠祠之後堂爲資仕余曰  
奚爲逸資學也更曰正誼明道嗚呼竊聞之孟子曰  
待文王而興者凡民也若夫豪傑之士雖無文王猶  
興由王而降理學寥寥董子者崛起於功利喧譁之

中而一以正誼明道爲說故能度越諸子以友古之  
大儒所謂豪傑之士非耶夫待文王而興者猶謂之  
凡民世有師範在前典儀在望而竟未有興者君子  
又謂之何嗚呼登斯祠也可以發深恐矣 嘉靖維揚志

戚賢重修董子祠記夫篤志好古明明之務也欽風  
崇祀賢賢之懇也漢儒董仲舒嘗爲江都王相兩淮  
運司其故宅也祠舊在司後正德間畢轉運請於侍  
御朱君卽司右書院改之特門專寢用便趨謁義舉  
也歷歲既久百爾圯壞侍御象岡胡公植下車展拜  
愀然不樂爰語運使李君邦表同知白君濬量發公



帑檄屬鳩工拓隘爲廣易橈而隆妥靈聳觀視昔爲  
倍李君白君遙觀厥成走使語予欲彰厥徽夫董子  
之學度越漢代淺薄罔攸知然諸公雅意匪直區區  
修理不可虛也夫明明所以昭德賢賢所以樹風也  
憶昔廣川下帷發憤寤寐麟經三年不窺園圃自治  
何專也大廷三對天人一致撥亂反正不少假借卒  
悟英主擺超習故兩事驕王率匡以禮江都膠西轉  
加禮敬而道誼功利之辨耿耿不磨據其所遭雖未  
大究然推明孔氏以掃百家之陋西京文學類多宗  
祖殆非無所發明者也諸公是舉雖盡觀風之道以

達有司之務而其雅意蓋將求歸示勸未可易易視  
也予昨如鹽城獲與象岡使君邂逅興化偶及維揚  
故事因語予曰宋文文山祠在城南每春秋司祀董  
而府不與豈司獨專儒雅耶府祀文而司不與豈府  
獨專節概耶頃與釐之府主文祭而司必陪同其正  
也司主董祭而府必陪反其醑也予時笑而未應回  
舟諭眾僉曰云云懿好高識不可嘉乎夫高山仰止  
景行行止今祀典會通廟貌完美門扁大儒堂扁正  
誼明道董子光霽凜凜如生凡我同志幸生其後獲  
考其宗亦惟志文之志學董之學以求無負而已苟



陽羨其美陰弛其修非諸公尙友意也象岡懋修敦  
古豫章士論推之李君白君守箴飭躬無媿斯舉守  
懷幹同有聲歌之美吳推道南與有胥宇之勞皆時  
望也後賢有作知風之自云

康熙揚州府志

宗元鼎董子祠碑竊嘗謂紹聖賢之統而興復儒教  
於三代之餘傳帝王之心而能匡君道於萬年之後  
其惟董子仲舒乎當漢武帝初立時帝親策問賢良  
方正之士而董子以天人三策對大約其首篇言人  
君久安長治者惟有乎仁義禮樂教化之道而歸之  
以正心其次篇言人君正心之學知之而尤貴乎能

行之其三篇言人君教化之道不外乎德刑而德刑  
不外於法天終歸之以慎微其言雖多而其要如此  
夫仁義禮樂教化之道莫盛於唐虞而夏商周繼之  
其正心二字卽本諸人心道心之授受書曰黎民於  
變時雍其教化何如哉又曰安汝止又曰以禮制心  
其正心何如哉其知行之說本諸說命之中篇書曰  
非知之艱行之維艱其卽董子之義乎若廼明德慎  
罰雜見於康誥多方不矜細行終累大德若蹈虎尾  
若涉春冰非慎微之學乎董子學之醑也如此後之  
人君學其學則堯舜禹湯文武之學在是矣當其遭



秦火之後前則孔顏曾孟之已往後則周程朱蔡之  
未生不有董子何以使萬世君道之有其本哉彼劉  
向稱其爲王佐之才雖伊呂無以加其說誠然也吾  
揚運司官解卽董子爲江都王相時之故宅其後遷  
其祠宇於官廨之西今之柳巷董祠是也夫易王素  
驕勇問董子云勾踐與泄庸種蠡謀伐吳爲越有三  
仁乎此其意與景帝時七國吳王濞之意無異也董  
子以仁人數語折之而易王畏服然則有以靖江淮  
未形之亂此正誼明道之效也孰謂吾儒有其體者  
無其用哉爰爲碑銘曰大儒董子稟受元精天爲斯

文命岳誕生煌煌三策重乎西京統貫天人闡微剖  
奧以正君心以崇要道致令萬世禮樂是好命相江  
都能化驕王正身敷諫禮義是匡奕禩俎豆經學之  
光

兩淮鹽法志

袁袞弔董相賦江都有董相祠焉余謁而悲之作賦  
以弔其祠曰余有事於江都兮敬謁董相之故祠悼  
哲人之遐烈兮獨慷慨以申辭何夫子之純懿兮生  
不逢夫休時黃虞日遠兮禮法敗衰絃歌不陳兮譎  
詐相欺秦肆并吞兮燔燒書詩周孔道墜兮異說恣  
睢漢興馬上兮陋習未除叔孫小器兮又何制作之



能爲猗夫子之中庸兮卒潛心於下帷綜羣籍之華  
實兮宣六藝之精微躡游夏以升堂兮抗孟荀其並  
馳發奧義於天人兮王道粲其綱維彼武帝之愆多  
兮徒仁義之外施表章經術兮何獨棄此大儒豈斯  
文天喪兮實公孫其蔽之兩相驕主兮匡王禮儀虎  
口幸脫兮終身擯遺貪人敗類兮讒言罔極忠信弗  
臧兮仁賢杜塞悲士不遇兮撫遺文而太息蓋自古  
已然兮士入朝而見嫉駑馬充棧兮騏驎困於下勒  
幽莠盈疇兮嘉禾萎而弗殖文軒不知御兮傲輿是  
飾閭姝嫫母兮妍媸眩惑吳干龍淵寧弗利兮謂不

如鉛刀之斷擊濁世潛笈兮又孰能遠夫姦慝昔晏  
嬰之辨智兮尼父輟封而受厄姬文之拘囚兮崇侯  
搆其仇隙伍員之殞首兮大宰進其僻說三閭之沉  
淵兮由子蘭之嬖溺韓非斃於說難兮李斯爲之讒  
賊嗟賈生之通達兮曾弗容乎絳灌宜夫子之於公  
孫兮沉下僚而削迹

袁永之集

劉黃裳江都謁董相祠呈唐太史詩古道久不作經  
學何微茫憶昔漢明盛清問徵賢良嗟嗟廣川士哀  
然稱直方春秋究終始竹林鬱華芳木魚銅板訣機  
祥從此昌當時君相間胡使去江陽空彼天人言皇



術頓已藏孤堂半鹽滷清泉留其香春花自開謝江  
鳥從飛翔念我狷狷客摻筆窮天章擔登愧拜董負  
笈得依唐特秉正誼訓孤心與相望

藏徵集

姜埰董公祠詩揚州城內董公祠萬古千秋繫遠思  
漢主明堂興禮樂儒臣遺廟起威儀春秋早上三篇  
策吳楚誰令七國悲自是武皇能好士晚年封禪歎  
何爲

敬亭集

王士禎董公祠詩董公祠廟已荒涼憑弔西京意倍  
傷漫以園陵勞主父祗將經術奉驕王時逢明主身  
空老志在春秋道正長我是愛傳繁露學玉杯曾問

廣川鄉

帶經堂集

施潤章董仲舒祠詩攘攘五都市南北交馳驅貴賤  
各有營崩迫無停時我過董子祠中心悵有違相傳  
此舊宅精靈儼在茲斷碣蝕蒼蘚荒基走伊威蘋蘩  
誰復薦清風吹我衣漢初尙文籍大道久迷離夫子  
挈墜緒卓矣王者師如何末世士罄折爭刀錐威鳳  
翔九仞腐鼠安足希

愚山先生集

彭定求董子祠行舊聞董相宅藻井涵清光祠宇今  
改構巋然臨高岡棖題旣闕敞庭階無蕪荒再拜瞻  
德容整襟一升堂伊昔秦火熾六籍寢銷亡漢武尙



增修身縣志 卷之八  
文治發策升賢良拔萃得醕儒宜置禁闥旁藩封乃  
出傳啟沃虛巖廊所以炎劉運雜霸乖純王淮海居  
要服賴茲師道昌千秋尊俎豆流澤何深長實惟仁  
人言樹彼功利防淵源紹洙泗迴瀾一力當我儕生  
晚季濡首攻詞章卑卑時趨逐漫說班與揚正學獲  
由遵垂白生慚惶感此淹旅思作歌興慨慷 南昀集  
汪懋麟董子祠詩秦王昔暴虐焚滅詩與書漢興至  
文景禮樂猶缺如孝武策賢良首舉董仲舒上書陳  
大道天子嫌其迂空令事驕王出相終江都大儒不  
能用方士何爲歟青青茂陵樹斬伐無復餘峩峩董

子祠俎豆猶不虛我思天人理瞻望增歛歔 百尺梧

祠閣集

謝太傅祠在運司治南卽太傅安故宅也內有法雲寺  
歲久僧以寺易門額

國朝雍正九年經臺省學使核正之祠舊有雙檜復補

植建堂焉 雍正揚州府志

續志考正謝太傅祠在運司治南又有在邵伯鎮  
者宜併敘于此不合另出

崔公祠在運司治右祀

國朝兩淮運使崔華康熙三十二年華卒於官眾商思  
其德立祠於署側 兩淮鹽法志



程浚崔公祠記康熙癸酉夏兩淮都轉運使崔公擢分守陝西涼莊道布政使司參政未蒞新任卒於維揚舊治嗚呼公之功德在人可謂淪肌而浹髓矣淮揚兩郡商民無不雨泣哀慕不能忘因是請於上議崇祀名宦又建祠宇以垂萬禩歲丙子春祠落成與漢董公仲舒晉謝公安石祠相望門庶壯麗堂寢崇閣中立公像神清骨重見者生敬浚等聚眾謀曰維茲麗牲之碑闕然無辭何以妥靈又何恃以垂後於是追遡公生平行事而詮次之謹按公房山毓德以文章起家既登仕版不忘貧賤天性孝友能分俸以

敦大被之義鄉里稱之初令開化吳耿逆亂盜賊蠭起武弁包藏禍心蹂躪城內公奮身冒矢石城乃獲全總憲李公特疏奏其績於

天子得超擢維揚守公膺異遇益冰蘖自持民免庚癸之呼士有菁莪之化

當仁稱公治行第一念兩淮鹽運使財賦浩穰非廉潔者不克振謂公可甲子初履任即曰鹽法做壞亦孔亟矣催餉者旁午於道而逋課者不少不以恩結之則情不我告又曰兩淮商人衣冠之族也催徵一事我何忍以箠楚施之且緩急人所時有今不足需之異時



於國家無銖黍失也我惟洗手視事剔釐奸蠹與商  
 竈安恬從事商必不我負商等聞此言無不低回顧  
 戀若嬰兒之於慈母也蓋鹺政委靡前之為大吏者  
 操之或迫商益以困得公開誠布公不矜飾邊幅又  
 能處膏腴而不潤故國課未嘗絀而商莫不蘇息皆  
 公之功也至鹽政一事掌故有考裨益良多若其修  
 隄施藥賑竈育嬰種種美績播在人口者不少昔明  
 兩淮都轉運使范公諱總者瀋陽人也值鹽法弊壞  
 范以治家事者治之商人思其德嘉靖間建祠於城  
 南後子孫為大僚者項背相望然則公之祠與范公

並峙千秋俎豆輝映豈偶然也哉公諱華字遵生直  
 隸平山人己亥進士 同上

深仁祠在瓊花觀內西隅嘉靖四十一年建祀知府吳

桂芳石茂華巡按御史吳百朋巡鹽御史崔棟 萬曆江都縣志

旌忠廟在三元巷東歲以三月三日九月九日祭宋死

節臣魏俊王方 同上

朱彝尊重修旌忠廟碑旌忠廟建自宋隆興二年以  
 祀左軍統制魏侯俊後軍統制王侯方兩侯均死於  
 戰者也紹興三十一年金煬王淪盟括三十二總管  
 之師合蕃漢步騎二十七萬自將以南餘艘舳舻分



據津隘直趨維揚宋之猛將張浚輩爲秦檜誅鉅殆盡恃以扞牧圍僅存病篤之劉錡爾乃用金字牌徹之甘以半壁天下九百萬金錢委之葉義問一懦夫奪錡招討印授之李橫此諸軍解體而不敢言者當其時王權旣敗韓林楊抗龔壽陸廉崔邦弼趙不悔先後棄城遁兩侯非不知主客之兵難以相當顧目擊大帥輒懦措置失宜搢沙爲溝圍以鹿角潮回漂去一時傳爲笑端勢且日蹙甯奮勇一戰以屈速勝持久之兵斯亦前事之所有志未遂並喪其元蓋首雖離心不懲也幸而采石之捷事定策功贈魏侯中

衛大夫邕州觀察使王侯拱衛大夫蘄州防禦使立廟故里祀之一堂繪部曲於廡左右記所云以死勤事則祀之者歟相傳神嘗感夢於明孝陵故載諸祀典歲以三月三日致祭歷年久遠廟圯不治今通政司使巡視兩淮鹽課監察御史曹公謁廟下語守者曰斯境內之神吾民祈報於是旌忠故典修舉不可緩也迺稽謀於眾攻金攻木給以餼廩取陳丹暗粉一新之屬其友秀水朱彝尊考兩侯之遺事撰碑文勒諸石兼作歌以侑神焉辭曰迎神兮丹衢新廟兮故都維暮之春兮月出之初神之樹兮庭隅靈風拂



兮舒舒將朋酒兮可踰神來格兮樂胥覲前兮巫後  
折山花兮盈手紛傳芭兮翔走神之留兮不留縛車  
船於廟口送神兮柳林王侯毅魄兮載浮載沉送神  
兮湖中魏侯死所兮無怨無恫小朝廷兮不武國無  
人兮禦侮持弱荷兮作柱客為狸兮主鼠罷揮戈兮  
穀弩第鳴金兮息鼓左軍後軍兮戰獨廕干夫一志  
兮可撓誕先登兮伐橐為國殤兮亦足以豪生不封  
侯兮死當廟食稽故典於祠官兮享祀不忒

曹公祠祀饒使曹寅康熙五十七年建在太平坊兩淮鹽法

志高大夫當州縣察對王封將滿大夫滿州刺史

晏公祠在小東門粉粧巷口祀死倭難晏銳

卞忠貞祠在南門內祀晉卞壺江南通志

卞壺字望之濟陰宛句人永嘉中依妻兄徐州刺史

裴盾盾以壺行廣陵相晉書本傳

明嘉靖間裔孫有五世同居者勅書義門表於祠雍正

揚州府志續志考正卞忠貞祠名籍官位見前名宦內邑多

卞姓為其後裔歲以春秋致祀

虞公祠在南門甕城內祀明萬歷間知府虞德暉

陳公祠在南門內大街東祀明萬歷間江都知縣陳邦



科

孔北海祠在南門薛副使巷舊志傳揚有漢孔融宅及

墓

亦故為其

國朝雍正元年知府孔毓璞因為建祠

雍正揚州府志

大忠祠在南門內新橋坊祀梁祖皓宋李庭芝姜才陸

秀夫吳從龍汪立信趙淮明茅誦崇剛朱哀晏銳邱陞

共十二人

吳從龍字子雲官建康府統制紹定兵難被擒使至

泰州城下誘降不屈死廟祀揚州賜額褒忠

宋史忠義傳

汪立信六安人咸淳十年為沿江制置使江淮招討

使募兵援江上諸郡至高郵聞賈似道兵潰扼吭而

卒 宋史本傳

茅誦字大芳泰興人博學能詩洪武中儒士應辟典

教淮南考績入朝高廟召對悅之擢秦府長史勉以

董子輔相之業大芳感激額其堂曰希董建文君即

位擢右副都御史靖難兵起死之

吾學編祖皓李庭芝姜才陸秀夫

趙淮崇剛朱哀晏銳邱陞俱詳見名宦

雙忠祠在廣儲門外梅花嶺祀宋李庭芝姜才

江南通志

曾襄愍祠一在廣儲門外一在三元巷曾家垣祀明嘉

靖間總制三邊後贈兵部尚書曾銑每年春秋致祭康



熙二十七年巡鹽御史李某撥學田十畝為祀產

曾銑詳見

物人

王公祠在廣儲門外祀明巡鹽御史王明運使裴述祖

兩淮鹽

法志

吳公祠在廣儲門外梅花嶺祀明萬厯間知府吳秀嶺  
即秀所築秀有惠政民立祠祀之歲久圯廢後建蕭孝  
子祠嶺下遂奉主其中故碑猶嵌壁間  
凌儒吳公祠記公之受命來也乘民航涉境角巾徒  
步博訪閭閻之所急知種種狀於是下車首請復五  
塘當道厄其請公憤激即日攜家去士民遮道號呼

閩閩監司為請於朝獲俞旨塘復其三黃河赴江入  
海朱家港芒稻河其尾閘也公請疏之不報未幾河  
嚙漕堤六邑田廬蕩為浮菹公撫膺流涕攜殘民日  
晡之朔望戴星起謁先師畢坐堂上質諸生經義錫  
以楮楮隨所質上下以為勸激瀕行密緘數題授博  
士員翌日試諸生膳餼倍常格悉出俸金自下車及  
代去無一間者過衛治觀其敝延主者詢故以經費  
不支對乃悉俸起其敝甫暮而衛棟隆起城內市河  
闕淤僅存脉流又新城北隅隍與陸平草木蒙茸人  
跡罕覩公挑北隅之隍深廣若干丈引官河之水注



其中濬城內河淤者與新隍之水卽臨流闢門號曰  
廣儲內建糧倉外築梅嶺民居城市於是新舊二城  
水相縈帶舟楫往來數十年間寂之墟蒸蒸然肩摩  
踵接矣無何日本犯順公誓與城相存沒乃儲穀練  
兵崇堞浚壕樓櫓戰具一時悉備吏呈夙案僉報大  
戶以備城守公叱止之民不擾揚有承值鋪戶以應  
諸司之求者胥吏緣以爲奸公斧其碑與民平價商  
賈大悅訟牒至令訟者行拘郡符下州邑以鋪遞傳  
至而公庭之役不一遣以故閭里晏然軫憐民抑豪  
右遴選鄉耆遇卿士大夫以禮凡有關白民瘼者偃

躬虛懷以納之化行合屬郡大治薦剡林上乃晉興  
泉兵臬憲揚人懷公遺愛欲頌甘棠薦紳輩請予言  
以誌思子曰吾揚之思乃爾耶公初蒞揚卽伏謁前  
守歸安蔣公瑤祠淚潛潛下謂左右曰此吾懿親也  
先吾守揚茂著循良績吾才雖不及敢不勉是公在  
揚思蔣去揚民又思公然則蔣也者公之先旌耶公  
也者揚之高山耶可誌思矣公諱秀號平山隆慶辛  
未進士浙江湖州之烏程人

敬亭書院在府治北橋康熙二十二年兩淮商人爲巡  
鹽御史裘充美建充美號敬亭居官有清裁以恤商論



湖口不應設關去位商人感之為建此每歲開橋日記  
公於堂京江張九齡記 鹽法志

續志考正敬亭書院係裴御史祠書院在學校內  
不合混入祠祀張九徵亦誤九齡

郝公祠在城西法海寺側明崇禎間敕建祀房縣知縣  
郝景春並其子鳴鸞 景春詳見人物

施公祠在廣儲門外祀康熙間知府施世綸 世綸詳見名宦  
蕭孝子祠在廣儲門外梅花嶺旁祀孝子蕭日曠其妻

節婦俞氏附 人對公  
顧九錫蕭孝子祠詩悠悠孝子祠蕭蕭梅花嶺森森

林前樹淒淒夕陽影楚楚瞻丰采肅肅精誠猛言念  
在血肝千秋鬼神凜 春江草堂近稿

范文正公祠在城西平山堂東祀參知政事范仲淹以  
四子純祐純仁純禮純粹配

國朝增祀公後裔大學士文程總督承謨  
歐陽文忠公祠宋慶曆中歐陽修知揚州民感其德為

立祠歲久圯廢祀於平山堂後樓以蘇軾亦知揚州置  
主為配康熙四十四年

**聖祖** 仁皇帝御書賢守清風額懸祠內  
廣陵三先生祠在城西十里平山上舊為司徒廟嘉靖



增修身縣志 卷之八  
六年巡鹽御史雷應龍巡按御史王鼎撤司徒像塑安定先生像於中令有司春秋祭祀給其裔孫胡鯨胡璣衣巾爲生員世守其祠二十一年春巡鹽御史胡植知府朱懷幹復以宋鄉賢樂菴先生李衡竹西先生王居正並設木主同祀 嘉靖江都縣志

後增祀李樹敏沈珠歲以二月十六日九月九日祭 萬曆

江都縣志

胡植廣陵三先生祠堂記廣陵今稱三先生爲宋胡安定瑗王竹西居正李樂菴衡嘉靖初臺察雷君應龍撤非鬼像卽厥祠祠安定焉示崇正也予按兩淮

之明年維壬寅春王正月祇謁祠下祠下諸校生胥諗願以王李二先生配食永永樹之風聲謀諸郡守懷幹輩僉唯唯遂增牢安主諷吉肇禋扁曰廣陵三先生祠邦人士聞之訢訢若有興者乃申告曰豪傑踵興山川協靈生式於鄉歿尸於社民之秉彝雖百世可知也傳稱門人皆循循雅飭又知稽古愛民每誦至此未嘗不歛衽起敬也蓋嘉安定之教爲有本云而世徒以條約概之殆淺乎知安定者竹西自隱約時卽不以希世而改是非之心樂菴宦跡所至專務誠意化民斯其人可易易視哉以予所聞彼皆所



謂豪傑之士而無文猶與者假令登孔氏之門當不在閔冉下矣夫崇賢以貞教也祀往以勸來有倬維揚稱雄振古譽髦斯士誕際昌明孔軌可追鄉範伊邇論世私淑無亦是務乎苟徒俎豆云爾奚取於三先生之堂是為記

嘉靖維揚志

增又賦謝古愛風

崔桐三先生祠詩同秉文旌重昔賢陰陰祠廟翠微懸山河氣壯三靈合洙泗流長一脉傳蘇館杏桃湖院種竹庭風月樂菴連我來媿乏蘋蘩薦聊酌山中

第五泉

東洲集

武王廟食派樹之風流

五烈祠在城西司徒廟左祀池烈女霍九女裔氏程氏

周氏也五烈死節異時而俱葬平山堂之右舊有雙烈祠祇祀池霍二烈女雍正十一年知縣龔鑑謀之里紳汪應庚改建五烈祠以勵風化焉

龔鑑五烈祠碑記登蜀岡迤平山堂右有列塚纍然接隴臨蹊東西違各數武是為五烈之墓五烈者池氏霍氏裔氏程氏周氏也先是池烈女窆其所其自霍以下人稱其烈無殊也而欲令相近先後為墓於其側墓地故屬江都析縣後乃隸甘泉歲壬子余來視縣事展謁幽埏晞思風美之所扇以為節義者訓俗之標建也顯幽旌善可以競勸五烈生秉峻節合



增修古泉縣志 卷之八  
義同風緬紀英淑宜當除地啟宇崇而祠之於是乃  
謀於邑士大夫時則汪君應庚喟然而興肩乃率作  
役財鳩匠授模締構閱時告畢來諭成功予乃躬率  
邑人潔蠲敬饗禮終顧瞻榱桷低徊久之爰命伐石  
書歲月且著其事案池烈女故貧家子早失母及笄  
父以字吳某子廷望廷望從軍死於粵吳請於女父  
欲以改配其次子有成言矣女偵知之伺其父出投  
繯死霍氏稱霍九女事父母以孝著年十九許嫁李  
正榮十日正榮死女聞之號慟自殺以殉里人義之  
爲舉其喪葬於池烈女墓右稱雙烈云其後有裔氏

爲孫某婦姑及其二女皆不潔他日歸具白母且誓  
曰弗死懼及吾無以視人世旣而還家則姑及二女  
方共客飲婦恥之乃扃戶紉其衣自袒而桂而裾綴  
連不解然後經其頸死事聞郡守孔毓璞歎之爲立  
墓於雙烈之旁程氏者項起鵠妻也成婚三月起鵠  
賈於外死粵西之岑溪訃音至卽哭辭舅姑且屬其  
叔以善養遂自經也旣葬邑令王元穉親詣墓門爲  
下拜題其碣而去周氏者江甯人適程國材移家於  
揚國材暴疾終周誓以身殉父往慰諭之泣日兒有  
宜死者三上無舅姑下無子且貧若此衣食安所賴



卽嫁耳嫁豈兒所忍言兒志決矣卒不食而死嗚呼  
此五烈者少長窮巷編戶之中未有從姆教稱詩書  
而服乎女箴之宏訓也又非有心則乎前古烈義截  
耳斷髮磨笄之行而倣而行之也且生者情所貪死  
亡生人之大惡雖以大雅所勗見危而慄或未能勉  
強又況女德斯在陰儀不剛曩使回易其心亦所固  
然無足怪而五烈生非清門鑒非圖史並慷慨大節  
決然誓命以裁當其據節銳情一往不改金石同其  
精堅鬼神泣其幽渺所爲寧載於義而死無載於地  
而生者何其凜凜與則是無異故貞良動於性本志

氣精專誠一之至也或謂裔以遭逢不淑預戒垢污  
周以俯仰靡依早自引決並卓然志行矣至如程者  
使其畢節以養舅姑奚必不如陳孝婦而池霍二女  
則又纓而室處固未成婦案以前經宜均可以無死  
而今皆沒命殞身相從爲愈無乃行過乎禮正而非  
中者與然天下惟其理之至是以獲乎心之可安往  
聖之所爲設中而制節者以進中人非以域上智也  
而若其篤乎至性而履人情之難能聖人卒亦未嘗  
不貴之也然則五烈之所處雖殊而抽揚餘烈莫不  
亘日月而薄雲霄者豈非其大義之同歸也哉且夫



增修身果志 卷之八  
三  
牖民以章教爲務自昔爲政崇獎前徽固將以忠孝  
貞廉之行動其懿德之好而生其感也如五烈之清  
英潔白誠宜激厲澆頹此而不圖其何以奉紹理化  
予甚憇焉是用肇造祠宇樹以風聲庶夫仰遺芳者  
知所興起而深幸汪君之能相與以有成也汪君淮  
南宿德居鄉行義弗倦今茲盛舉其爲功於名教尤  
大祠建於雍正十一年九月閱三月而訖工中爲堂  
凡若干楹兩廡若干楹蓋明靈妥於是是爲不泯矣  
葺而新之尙所期於來者

以上原志

吳公祠在舊城毓賢坊小牛棗巷祀直隸天津道吳毓  
蘭光緒十年其子鼎榮奉

勅建

按毓蘭字香畹安徽合肥人以候補道奉檄駐軍便  
益門外五台山同治六年十二月捻逆賴汶洸敗竄  
南下所過邵伯仙女等鎮蹂躪不堪毓蘭偵知賊由  
東來遂整軍灣頭以待該逆力竭就擒揚城賴以安  
堵光緒六年補直隸天津道九年卒於官

以上新增







